

Jon

Lagale Lavavang At Ne Iesu Karisito Jon Ga Malagan I

Levelinga Loklox Axasep

Levenmaares 85-95 A.D.

Jon neni lara atnedi lasangaun mi legepura luvuttadi loklok ka anasa at ne Iesu. Buaang levenaleng neni ga emu tangtagap amisik mi ne Iesu, kuren la neni ga ven leven gugu ren la gang tonga levenanasa at ne Iesu. Mak mi ne Metiu, la ne Luk, nedi diga malagan avot levenbuk atdi la lempapaase atdi ga sixit emu mun. Ne Jon neni ga mu pit la ga malagan lempapaase ga lok petpes aleng tino. Do ata ven na levenmamalagan at ne Jon i ven ngan ta do lara vetpes mo ga malagan i, ketla na levelinga ne Jon axa ga malagan i. Neni goxo vara i do na lox asilok axa i, kuren la neni ga lok; “Mo luvuttadi loklok ka anasa ren diga lok,” ua i epovo gita lok, “Mo luvuttadi loklok ka anasa ren maga lok.” Mo do una us lavavang ne Jon ga malagan i, uba ven i do ne Iesu neni lavatturunen at lempapaase ruturun. Neni lavatturunen at lisisixam la lorooro la neni lakde mi ladan at lorooro lexen. Neni laradi loklok tatao la neni ik lok tatao avukat dik. La neni langas nedik di lok ka i uto at ne Temen dik ne Moroa. Neni lentangas atdik, la Leeme Silok atdik, la lavatturunen atdik la neni mun ne Nitna ruturun at ne Moroa.

Lengkot silok keneng at na lubuk:

- 1:1-18 Iesu neni ga laa meva kusu dina visix i de.
 - 1:19-51 Iesu ga ro ka lentaba atnedi luvuttadi loklok ka anasa.
 - 2:2-12:50 Iesu ga gugu saxaven to melamgo at limixin.
 - 13:1-17:26 Levempapaase at ne Iesu at laanan kaala.
 - 18:1-19:42 Larangtanga alis la lanmet at ne Iesu.
 - 20:1-21:25 Iesu ga roo xat basinge lanmet.
-

Iesu Neni Lavapaase

1 ¹Ganoxa at lereot lavapaase mo gara nemen pam; la neni gak lox eburu mi ne Moroa, la neni ga epovo mun mi ne Moroa. ²Boro xa at lereot, lavapaase gak lox eburu mi ne Moroa.

³Keneng teren ne Moroa ga rudum li levempanga axap; la kopmen tepanga at nai luruntudum li, gita ravasu boro at tara vetpes. ⁴Ga lavapaase neni lavasuun at lorooro, la na lorooro ga raba laxasep ti limixin. ⁵La laxasep i soosoo ri limixin at lamain la mo limixin kopmen di goxo lox epovo i do gita lox asi i.

Lovotpot At Ne Jon Laradi Sep Susu

⁶Moroa ga riki laradi vapaase ren, laasen teren ne Jon. ⁷Ga vot kusu na paase ri limixin mumu nom laxasep, kusu nedi diba ronga i la dina nuunu at laxasep. ⁸Neni xa xopmen mo laxasep; neni ga vot mun kusu na tong asu levelinga ap mo laxasep. ⁹Anai ni laxasep tuturun, laxasep ga si ude at na lavatbung menemen la ik lox asuusu laxasep ti limixin axap.

¹⁰Ni ga nemen at na lavatbung menemen, ketla limixin di goxo ven kibis i, keke do neni ga rudum li lempanga axap. ¹¹Neni gat pas uto at lubangmixin teren, ketla limixin axa ren di goxo siam ka i. ¹²Ketla nedi diga siam ka i la diga nuunu ren, ni ga lok li nedi ngan tinotno luvutnitna ne Moroa. ¹³Di goxo ravasu ngan luvutnitna ne Moroa at loklok at na lavatbung menemen, i ngan ta do laxamdak mi laxaalik at lenasun, koplā at lavavara at latlok, kopmen; ne Moroa xa, neni ne Temen di.

¹⁴Lavapaase ga vee radi la ga nemen kantubu atnama. Maga ven lisisixam teren, la ni ga umsu mi letaba nabalamu la levelinga ruturun at ne Moroa. La mo lisisixam neni ga lok ka i ngan legesamdak at ne Temen.

¹⁵Jon ga vavang min la ga xup lolos ti limixin keretna, “Neni na laradi nenia aga paase alii mumu i. Aga vaase xeretna, ‘Laradi mo naba vot melemu rak, neni i silok aleng tia, mila neni ga rooro avot tia.’” ¹⁶Letaba nabalamu ren i silok aleng tidik, la kerepmo neni ira lox anarong nedik, la iram taba amisik dik mi nom leveloklox anarong. ¹⁷Moroa ga raba avolo ne Moses mi Lenavolo; ketla letaba nabalamu at ne Moroa mi levelinga ruturun ga ravasu at ne Iesu Karisito. ¹⁸Tara goxovisi ven ne Moroa. Ne Nitna xusuk mun, neni i epovo mi ne Moroa, neni it kis esogo mi ne Temen la neni xa ga paase axasep dik mi ne Moroa.

Levesusue Mumu Ne Jon Mi Lugugu Ren

(Mt 3:1-12; Mk 1:1-8; Lu 3:1-18)

¹⁹Limixin amgomgo ro Jerusalem diga riki aonon lentaba lavamaasa la lentaba luvuttadi gugu at loogu laplavang^a uto ri ne Jon la diga sue i do,

^a 1:19 Na luvuttadi, nedi at libibinat at ne Levi la diga lok tooro lavamaasa ro xeneng at loogu laplavang.

“Nenu nege?” ²⁰Jon goxo ronga xape di xusu neni gi toxo vorang lususue atdi, ketla neni ga vaase axasep di xusu diba xasep. Ni ga vaase xeretna, “Nenia xopmen Lanarong.”

²¹La diga sue manga i, “Nenu nege? Kereva, nenu mo leeme vapaase alii megano, ne Elaia?”

Jon ga vorang i ridi xeretna, “Nenia xopmen.”

La diga sue manga i xeretna, “Kereva, nenu leeme vapaase alii, ne Moroa ga xaape min at levelinga at ne Moses?”

La ni ga vorang i ridi xeretna, “Kopmen.”

²²Melemu rinotno diga sue i, “Una tong i rinama do nenu nege; ma vara i do maba lok ka tovoporang at na lususue uto atnedi limixin amgomgo diga riki nama. Una tong i do nenu nege.”

²³Jon ga vorang i ridi mi levelinga at leeme vapaase alii ne Aisaia, ni ga lok keretna,

‘Nenia mo lara ip kup to at lamatbin keretna, mina lox akmokso langas ti Leeme Silok.’ *Ais 40:3*

²⁴La lentaba lubung Parisi, luvuttadi amgomgo diga riki di, diga vot pasa ne Jon. ²⁵Diga sue i xeretna, “Do nenu xopmen Lanarong, kopla ne Elaia, kopla mo leeme vapaase alii, la tila u sep susu limixin?”

²⁶Jon ga vorang i ridi xeretna, “A sep susu limixin mi ladan mun; kantubu atnimi laradi mo i tu, nemi xopmen minaklen i. ²⁷Neni mo naba vot melemu rak, ketla nenia axo epovo xusu ana soxomus luvanga vatpas teren mila i silok aleng tia.”^b

²⁸Ana levempanga ga ravasu ro Beteni, to at lara lenep dan Joridan, ne Jon ga sep susu limixin e.

Lanasip At Ne Moroa

²⁹Ap mo manga lara laaleng Jon ga ven ne Iesu gat pas go boro, la ni ga vaase xeretna, “Pen ba i, ni nom Lanasip at ne Moroa naba doxoma xepe laxakapmek at limixin at na lavatbung menemen kopok. ³⁰Neni na laradi nenia aga paase min tinemi, la aga vaase do, “Laradi mo naba vot melemu rak, neni i silok aleng tia, mila neni ga rooro avot tia. ³¹Gano a goxoklen i do neni nege, ketla nenia aga vot de ngan laradi sep susu mene mi ladan kusu ri lox asuvos i ri leme Israel.”

³²La ne Jon ga tong asu lavapaase axasep keretna, “Aga ven Loroonan Kaala ga rava si boro vana at laxalibet la gasga i, ga lok ngan lamno.

³³Nia xovisi goxoklen i, ketla ne Moroa ga riki ia xusu anap sep susu limixin mi ladan la neni ga lok tia xeretna, ‘Uba ven Loroonan Kaala naba si boro vana la nasga taradi; neni mo laradi naba sep susu limixin

^b 1:27 Anai ni lavapaase poovo ri lox asuusu i do ne Jon ga lox asu langsung loklok ngangao ren ti ne Iesu.

mi Loroonan Kaala.’³⁴ Agara ven pam i la a tong i rinimi do neni ne Nitna ne Moroa.”

Luvuttadi Loklok Ka Anasa At Ne Iesu

³⁵ Ap mo manga lara laaleng melemu Jon ga nemen manga ro saparap ladan sen Joridan eburu mi legepu radi loklok ka anasa ren. ³⁶ At loxonaleng neni ga ven ne Iesu gat pas aurer i, la neni ga lok keretna, “Pen ba i. Neni na, lanasip at ne Moroa.”

³⁷ Mo laradi loklok ka anasa ren duga ronga na levelinga la duga emu eburu nga mi ne Iesu. ³⁸ Iesu ga rem gili la ga ven du, duga mumu asu i, la ga sue du, “Kereva mo?”

Duga vorang i rin keretna, “Rabai. Loogu ram ua?” (Lavasuun at loxoling Rabai do, leeme loklox ase.)

³⁹ La ne Iesu ga lok, “Uto dik ata ven i.” Kuren la duga emu min la duga ven lenep neni gak lok teren; la duga nemen go ap mo laaleng axap eburu min, ga se at lavanuet konaleng ga ukantinao.

⁴⁰ Endru, neton ne Simon Pita, neni lara atdu ga ronga mo levelinga at ne Jon la ga emu mi ne Iesu. ⁴¹ La soso mun ne Endru ga vot pasa neton, ne Simon la ga lok tin, “Mara long lenget ka vam Lanarong.” Lavasuun at loxoling Lanarong do, Karisito.

⁴² Melemu neni ga lam ka ne Simon uto saparap ne Iesu. Iesu ga ven tin la ga lok tin keretna, “Nenu, ne Simon, nitna ne Jon. Laasen ta ru ne Kepas.” Na laasen i lok ngan mun ne Pita la lavasuun teren do Luat Kis.

Iesu Ga Ro Xaka Ne Pilip Mi Ne Natanael

⁴³ Ap mo manga lara laaleng Iesu ga vara i do nat pas uto Galili. Ni ga vot pasa ne Pilip la ga lok tin keretna, “Ude u, la una mumu asu ia.”

⁴⁴ Pilip neni boro Betsaida, lemenemen at ne Endru mi ne Pita. ⁴⁵ Pilip ga vot pasa ne Natanael la ga lok tin, “Mara long lenget ka vam laradi ne Moses ga malagan axasep mumu i ro xeneng at levenbuk at Lenavolo; la lavaeme vapaase alii bok diga malagan mumu i. Neni ne Iesu, lamdak at ne Josep, boro Nasaret.”

⁴⁶ La ne Natanael ga sue i, “I epovo xusu tempanga avukat naba vot boro Nasaret?”

Pilip ga lok, “Ata onon la una ven ba i.”

⁴⁷ At loxonaleng ne Iesu ga ven ne Natanael ga vas auret, la ni ga vaase mumu i xeretna, “Neni laradi ruturun boro Israel; kopmen tempanga xaxarang nak lok at lorooro ren.”

⁴⁸ La ne Natanael ga sue i. “Uklen ba ia xereva?” Iesu ga vorang i rin keretna, “At loxonaleng ne Pilip kovisi na lam kaka u, ara ven pam u, ut kis to maxopok at luuna pik.”

⁴⁹ Natanael ga lok, “Rabai. Nenu ne Nitna ne Moroa. Nenu loorong silok mede Israel.”

⁵⁰Iesu ga lok tin, “U nuunu mene rak mila nenia a tong i ru do a ven u ro maxopok at luuna pik. Uba ven levempanga silok aleng ti na lavanga.”
⁵¹La ni ga lok bok tidu, “A tong tuturun i rinumu do muba ven laxalibet na rem suang la muba ven lubung angelo at ne Moroa dinat pas si la dinat pas urut uto saparav ia Laradi Mevana.”

Loklox Epot To Kena

2 ¹Melemu at lavantun levenaleng, limixin diga lok leluxa loklox epot to Kena at lenep silok Galili. Nenen ne Iesu bok mo gak lok, ²la ne Iesu eburu mi luvuttadi loklok ka anasa ren bok mo diga sing nedo do diba vot go at loklox epot. ³Se limixin diga in axap levendan vaen, nenen ne Iesu ga lok tin, “Levendan vaen atdi ira xap pam.”

⁴Iesu ga lok tin, “Naga, u noxo tong ase ia mi tavanga xusu ana lox i. Laaleng ti vaxaru kaxat lugugu rak kovisi na vot.”

⁵Nenen ne Iesu ga lok ti mo luvuttadi gugu, “Mina mumu asu levempanga salai do neni na tong i rinimi.”

⁶Limixin me Judaia diga ruuna leretere at loklok at lotu atdi mumu logosogos panga, ni lavasuun mun teren la lavanna lempat buxom tuntu mo ga nemen; nedo getgesara diga epovo rin tuntu ka tegepu sangaun kopla tavantun sangaun lenbuxak kidi.

⁷Iesu ga lok ti lavasaxaruki, “Minantu i na lempat buxom mi laxadan.” La digantu aumsu di mi laxadan.

⁸La melemu neni ga lok tidi, “Monga minantu ka toxongkadan at nom la mina lok ka i uto at laradi i lok tata leluxa.”

Diga lok ka i uto saparap mo laradi, ⁹la ni ga in tong pen mo loxongkadan, mo ga vee vaen pam. Ni goxoklen i do na lavaen ga la meva, ketla lavasaxaruki ren digaklen i; kuren la neni ga ro ka mo laradi diga lox aepor i, ¹⁰la ga lok tin, “Limixin axap di in lagale lavaen avot la melemu do dira in aleng, nedo dira in ba lavaen i so gamasa, ketla nenu ura lili vam lavaen avukat ise nga mo.”

¹¹Nai lavanga sangsangu avot tinotno ne Iesu ga lox i. Ni ga lox i na ro Kena at lenep silok Galili; neni ga lox asuusu lisisilok teren go, la luvuttadi loklok ka anasa ren diga nuunu ren.

¹²Melemu at nai, Iesu eburu mi nenen la luvutneton la luvuttadi loklok ka anasa ren digat pas uto Kaprenaum, la diga nemen lixilik go at lentaba levenaleng.

Iesu Ga Beles To Xeneng At Loogu Laplavang

(Mt 21:12-13; Mk 11:15-17; Lu 19:45-46)

¹³Laaleng ga auret ti leluxa at Lovovolo Pe at leme Judaia, kuren la ne Iesu ga urut uto Jerusalem. ¹⁴To xeneng at loogu laplavang neni ga long lenget ka luvuttadi diga sesep mi laxanbulumaxao, laxasipsip, la

levenamno atdi, la luvuttadi loklox ekun pilas bok mo digat kis saparap levengkot lili atdi. ¹⁵Iesu ga lok lakpiksa mi luxua, la ga xala su mi nom levempanga mi lavanuet kangkedek atdi boro xeneng basinge loogu laplavang, laxasipsip eburu mi laxanbulumaxao; la ni ga sogo pupukus levengkot lili la ga reeve laxampilas atdi. ¹⁶La ni ga lok ti luvuttadi diga sesep mi levenamno xeretna, “Mina lok kepe nom lavapixa uto xamang basinge na loogu. Nemen mita lok loogu at ne Tamak na lok ngan ta loogu sesep.”

¹⁷Luvuttadi loklok ka anasa ren diga doxoma ka i do Lovoang Kaala ga lok,

‘Labalamu rak ti na loogu ram ne Moroa i lolos aleng la ni lavasuun teren limixin bilinga dinaba sev amer ia.’ *Sam 69:9*

¹⁸Luvuttadi amgomgo at limixin me Judaia diga paase lolos tin keretna, “Una lok tavanga sangsangu xusu ti lox asuusu i rinama do nenu u ruuna lololos kusu ri lox i na.”

¹⁹La ne Iesu ga vorang i ridi xeretna, “Do mina ut asi na loogu laplavang, aba vaxaru amlong manga i xeneng at lavantun aleng.”

²⁰Diga sue i, “Uba vaxaru amlong i at lavantun aleng mene kereva? Diga lok na loogu laplavang at lavanuet sangaun mi lavanna maares axap.” ²¹Ketla ne Iesu xopmen goxo paase mi loogu laplavang, ketla neni ga paase mumu labantuxu ren. ²²Melemu at laaleng neni ga roo xat amlong at lanmet, luvuttadi loklok ka anasa ren diga doma amlong ti na levelinga ren. La diga nuunu at Lovoang Kaala la diga nuunu bok ap mo levelinga ne Iesu ga tong i.

Iesu Iklen Limixin Axap

²³At laaleng ne Iesu ga nemen to Jerusalem at leluxa at Lovovolo Pe, buaang nedi limixin diga nuunu at laasen teren atla diga ven mo levempanga sangsangu ren. ²⁴Ketla Iesu goxo nuunu atdi mila neni gaklen avukat limixin axap. ²⁵Goxo epovo bok do teta gita re ri ne Iesu mumu loklok at limixin mila neni gaklen levempanga axap ga nemen keneng at lorooro atnedi.

Iesu Eburu Mi Ne Nikodimas

3 ¹Lara laradi laasen teren ne Nikodimas, neni lara atdi luvuttadi amgomgo at leme Judaia la neni lara atnedi libinam tadi at lubung Parisi. ²At lara laxanimin neni ga mu bung ti ne Iesu la ga lok tin, “Rabai. Maklen i do nenu laradi loklox ase, la ne Moroa ga riki u; kopmen tara na epovo xusu na lok nom lempanga sangsangu, mo do ne Moroa noxo lok tooro i.”

³Iesu ga vorang i rin keretna, “A tong tuturun i na ru; do tara noxo lok kaka livipisik amaxat, neni noxo vubeles at Linintoo at ne Moroa.”

⁴Nikodimas ga sue i, “Naba lok kereva la laradi mukun dina visik amu box i? Neni xopmen na epovo xusu na beles at lavatpaasa at nenen la nenen na visik amu manga i.”

⁵La ne Iesu ga vorang i rin, “A tong tuturun i na ru; do tara noxo lok kaka lesepe susu la noxo lok kaka lorooro maxat boro at Loroonan Kaala, neni noxo beles at Linintoo at ne Moroa. ⁶La laradi, nenen i visix i at loklok at ne temen mi nenen, neni at na lorooro xopok; ket dola Loroonan Kaala i visik amaxar i, neni i ruuna lorooro maxat at Loroonan Kaala. ⁷Nemen uta rakdu atla nia a tong i ru do, ‘Una lok ka livipisik amaxat.’ ⁸Lamanman it mas mu lavavara ren. Ung tonga i, ketla uxoklen i do i laa meva la it mas ua. I lok ngan mun nedi limixin Loroonan Kaala i visik amaxat di.”

⁹Nikodimas ga sue i, “Naba lok kereva na?”

¹⁰Iesu ga vorang i rin, “Kereva, nenu laradi loklox ase silok at leme Israel la nenu xa uxoklen i na? ¹¹A tong tuturun i ru, nema ma paase mi lempanga makleklen i, la ma tong lempanga maga ven i, ketla kopmen tinotno tara atnimi limixin amgomgo, na lok do na siam ka levelinga atnama. ¹²Nenia ara vaase vam tu mi lempanga at na lavatbung menemen la uxu nuunu at na levelinga rak; uba nuunu at levelinga rak kereva do nia ana paase ru mi lempanga boro vana at laxalibet? ¹³La kovisi tara goxo urut uto vana at laxalibet, ketla legesa radi mene ga si boro vana at laxalibet la neni nenia, Laradi Mevana.

¹⁴Moses ga lox aurut lovoovo sii ro at lamatbin kusu limixin dina ven i la diba roo; la kerepmo nenia, Laradi Mevana, limixin diba lox aurut box ia at laxaba, ¹⁵kusu nege do i nuunu rak, neni naba ruuna ka lorooro avolo. ¹⁶Moroo ga balamu rinotno limixin axap at na lavatbung menemen, kuren la ni gam taba mi legesa madak mun teren, kusu do nege i nuunu ren, neni noxo seeve, ketla neni naba ruuna ka lorooro avolo. ¹⁷Moroo ga riki ne Nitna ude at na lavatbung menemen kopmen do neni na lok li loxokoxo ri limixin. Ketla Moroo ga riki ne Nitna xusu neni Laradi Loklox Arooro ridi.

¹⁸Do nege i nuunu at ne Nitna, neni noxo lok kaka loxokoxo; do nege xopmen na nuunu, neni ira sok ka vam loxot tin, mila neni xopmen na nuunu at legesa madak mun at ne Moroa. ¹⁹Limixin dinaba lok kaka lumumuat atla, laxasepe gara vot pam at lavatbung menemen, la diga lox abulubun i; diga balamu aleng loklok at lubuxumin, mila leveloklok atdi ga lok kapmek. ²⁰Do nege i lok lempanga i lok kapmek, neni i xopara aleng tinotno laxasepe la ni noxot pas uto at laxasepe, mila neni ixo vara i do mo laxapmek teren na nemen at lasaxaven. ²¹Ket do nege luruptuvuk teren ik lok at luruturun, neni i nemen at laxasepe la kerepmo limixin di ven kisp lorooro ren la diklen i do ne Moroa i nemen eburu min.”

Iesu La Ne Jon

²²Melemu at nai Iesu eburu mi luvuttadi loklok ka anasa ren digat pas tangtagap maxeneng at lenep silok Judaia. Ni ga nemen eburu mido go

at lentaba leven gaaling, la neni gap sep susu limixin. ²³Jon bok gap sep susu limixin to Inon, goxo vaxalom solo boro Salim, mila levendan silok mo ga nemen go. Limixin digat pas parav i la ni gap sep susu nedi. ²⁴Ap mo levenaleng Jon kovisi goxo nemen at loogu xokoxo.

²⁵Lentaba luvuttadi loklok ka anasa at ne Jon eburu mi lara laradi boro Judaia diga etep mi levelinga mumu lususu rik lox adadat laradi at lemeren ne Moroa. ²⁶Kuren la diga vot pasa ne Jon la diga tong mo levelinga rin la diga lok tin keretna, “Rabai. Nenu una doma bilong ti mo laradi ga nemen eburu minu ro auret ladan sen Joridan, laradi nenu ga paase mumu i. Neni mo ip sep susu limixin, la limixin axap mo di mumu asu i.”

²⁷Jon ga vorang i ridi xeretna, “Kopmen teta naba ruuna ka tavanga do ne Moroa noxo raba i min. ²⁸Nemi xa miga ronga mo levelinga nia aga tong i xeretna, ‘Nia xopmen Lanarong, ketla ne Moroa ga riki amgo ia rin.’ ²⁹At loklox epot laradi i lok ka latkin tin, ketla lentangas teren i tu saparav i la ing tonga i; i lok momo xusu ri ronga levelinga ap mo laradi. La kerepmo nia a lok momo la lomomo rak i silok. ³⁰Neni naba silok aleng tia la nia aba lixilik tin.”

Iesu Ga Si Boro Vana At Laxalibet

³¹La ne Jon ga lok bok, “Do tara na si boro vana at laxalibet, neni i silok aleng tinotno ri limixin axap. Laradi mede xopok, neni at na lavatkangka mun la neni i paase ngan laradi mede at na lavatkangka. Ketla do tara na si boro vana at laxalibet, neni i volo aleng ti limixin axap. ³²Neni i paase mi levempanga neni ga ven i la gang tonga i, ketla kopmen teta i siam ka levelinga ren. ³³Do tara na siam ka levelinga ren, neni i lox asuusu i do levelinga at ne Moroa i raturun. ³⁴Mo laradi ne Moroa ga riki i, i paase mi levelinga at ne Moroa mila ne Moroa ga raba axav i mi Loroonan Kaala. ³⁵Morua i balamu aleng ne Nitna la ira lok li vam levempanga axap maxopok at loklok tatao ren. ³⁶Do nege i nuunu at ne Nitna ne Moroa, neni naba ruuna ka lorooro avolo; la nege do i ronga xepe ne Nitna ne Moroa, neni noxo ruuna ka lorooro avolo la lebelemamao at ne Moroa ik lok mu amisix i.”

Iesu Mi Latkin Boro Samaria

4 ¹Lubung Parisi diga ronga i do limixin solo diga mumu asu ne Iesu la ni ga sep susu di la kopmen bok ba timixin solo diga mumu asu ne Jon. ²Ne Iesu xa xopmen goxo sep susu tara; ketla luvuttadi loklok ka anasa mun teren digap sep susu limixin. ³Ne Iesu ga ronga i na levelinga la neni ga vas kaxat basinge nom lenep Judaia la gamlong manga uto Galili. ⁴At lavatpas teren ugo, ga epovo do neni nat pas keneng at lenep silok Samaria.

⁵Ni gat pas go Samaria la ga rupot to at lemenemen laasen teren Saikar; goxo vaxalom solo boro at lenep kangka ne Jakop ga raba lamdak teren ne Josep min. ⁶Lamamara dan at ne Jakop ga nemen e; la ne Iesu, ga molo ap mo lavatpas la ni ga xis go saparap lamamara dan. Taba ga xanangking.

⁷Lara latkin boro Samaria ga vas pot go xusu rintu dan. La ne Iesu ga lok tin, “Una raba ia mi toxondan ti inin.” ⁸Luvuttadi loklok ka anasa ren no nga di at lemenemen silok diga un panga anan.

⁹La nom latkin ga lok tin keretna, “Nenu laradi boro Judaia la nenia mede Samaria, tila u sing ia do anantu ka toxondan tu la una in?” Leme Judaia dixo inin at leventingtigon dan leme Samaria ding long tu ren.

¹⁰La ne Iesu ga vorang i rin, “Do uklen laramtaba at ne Moroa la mo laradi i sing u ri toxondan, i epovo do una sing i ri laxadan too, la ni naba raba u min.”

¹¹La nom latkin ga lok tin, “Leeme Silok, uxo ruuna tavat buxom silok kusu rintu dan la ladan no xa ik lok kopok. Uba lok ka rinotno nom laxadan too ua? ¹²Lurubuno atnema ne Jakop ga xe na lamamara dan tinama, la neni eburu mi laxamdak teren, la lempanga mi lavanuet kangkedek atdi, diga inin de; la kereva u lok do nenu mo u silok ti ne Jakop?”

¹³La ne Iesu ga vorang i ri latkin keretna, “Do tara na in at nom laxadan neni naba minu amu bok. ¹⁴Ket do tara na inin at laxadan nenia ana raba i min, neni noxo minu bok ba. I ruturun do laxadan nia ana raba i min naba lok ngan loxodan i puvut su xeneng at lorooro ren, la naba raba i mi lorooro avolo.”

¹⁵La nom latkin ga lok tin, “Leeme silok, una raba ia mi nom ladan, kusu a noxok minu bok ba la anoxot pot amisik de kusu rin tuntu dan.”

¹⁶La ne Iesu ga lok tin, “Una onon be la una lam kaka latlok taram. La munamlong ba ude.”

¹⁷Latkin ga lok tin, “Axo ruuna tatlok.”

La ne Iesu ga lok tin, “Ik mokso levelinga ram do kopmen tatlok taram. ¹⁸Ugara epot pam at lavalimo lavatlok la ti latlok mo nga nenu u epot teren, kopmen neni latlok tinotno ram. Lavapaase ram tia i ruturun.”

¹⁹Latkin ga lok, “Leeme Silok, a ven kisip ba i do nenu leeme vapaase alii. ²⁰Lavalabat atnama mede Samaria diga lotu parap ne Moroa at nai lakaana, ketla nemi leme Judaia mi tong i do lemenemen Jerusalem neni lenep ti lotu parap ne Moroa e.”

²¹Iesu ga lok tin, “Latkin, una nuunu at na levelinga rak; laaleng naba vot la limixin axap di noxo lotu parap ne Moroa at na lakaana kopla to Jerusalem. ²²Nemi limixin boro Samaria mixoklen tinotno ne Moroa mi lotu parav i; nema limixin me Judaia maklen ne Moroa mila Laradi Loklox Arooro neni at lubangmixin me Judaia. ²³Ketla mo laaleng naba

vot, nanga ira vot pam, la limixin lotu ruturun diba lotu parap ne Temen di mi lusumsuma at Loroonan Kaala la mi luruturun. Nedi mo limixin lotu ruturun, ne Temen di i vara di do dina lotu saporav i. ²⁴Moroa neni loroonan; la kerepmo nedi di lotu parav i dina lotu saporav i mi lusumsuma at Loroonan Kaala la mi luruturun.”

²⁵Latkin ga lok tin, “Aklen i do Lanarong, ne Karisito, naba vot. Do neni na vot, ni naba re axasep axap dik mi lempanga axap.”

²⁶Melemu ne Iesu ga lok tin, “Nenia vam na, mo nenu u epaase eburu min.”

Luvuttadi Loklok Ka Anasa Digamlong

²⁷Ap mo mun loxonaleng luvuttadi loklok ka anasa ren digamlong; la diga rakdu mila ne Iesu ga epaase eburu mi nom latkin. Ketla kopmen tara atdi ga sue latkin do, “U vara lavanga salai?” Kopla gita sue ne Iesu do, “Tila u epaase eburu mi nom latkin?”

²⁸Latkin ga vas kaxat basinge lavat buxom dan teren, la gamlong uto at lemenemen silok, la ga vaase ri limixin mego, ²⁹“Ude nimi la mina ven lara laradi; neni i vaase axasev ia mi lempanga axap neni agak lox i gano. Nenia a lok do neni vam Lanarong.” ³⁰Kuren la diga on basinge lemenemen silok la diga vas kaxat uto ri ne Iesu.

³¹Ap mo mun loxonaleng luvuttadi loklok ka anasa at ne Iesu, diga lok tin, “Rabai, una anan be.”

³²Ketla neni ga lok tidi xeretna, “Levempanga mo rak ik lok ti anan la nemi mixoklen i.”

³³La luvuttadi loklok ka anasa ren diga esue xantubu atdi xeretna, “Kereva, tentaba go di raba i mi teveluxa?”

³⁴Ketla Iesu ga lok lavapaase poovo ridi, “Leveluxa rak keretna, ana ronga res at lavavara at ne Moroa ga riki ia la ana lox axap lugugu neni ga raba ia min. ³⁵Nemi mik lok do, ‘Lavanuet gaaling bok mo la melemu ba mina sep kin at laraamang;’ ketla a tong i rinimi do mina ven avukat at laraamang; levempeven panga mo nga ia mukun pam la monga i gagas. ³⁶Mo laradi ik lok kaka bubua levempipisik at laraamang, i gu kaxat pam la ira lok kaka luunun tin, la mo levempipisik teren i lok ngan lorooro avolo; la kerepmo mo laradi itlotlo la mo laradi ik lok kaka bubua levempipisik at laraamang, du buru duba momo. ³⁷I lox asorun na levelinga i lok keretna, ‘Lara itlotlo la lara vetpes ik lok kaka bubua levempipisik at laraamang.’ ³⁸La kerepmo aga riki vam nimi xusu ri lok ka lempanga anan at laraamang, nemi xa xopmen mi goxotlotlo li i; lentaba vetpes digatlotlo li i go la nemi mik lok kaka levempipisik teren.”

Buaang Limixin Me Samaria Diga Nuunu

³⁹Buaang atnedi limixin me Samaria ap mo lemenemen diga nuunu at ne Iesu mila latkin ga lok do, “Neni ira tong axasep pam ia mi lempanga

axap nenia agak lox i.”⁴⁰ Kuren la ap mo loxonaleng mo limixin diga vot pasa i, diga sing i xusu na nemen eburu be midi; la ne Iesu ga nemen eburu midi go at legepu aleng.

⁴¹Buaang bok atnedi diga nuunu at ne Iesu, mumu levelinga ap mo latkin, ⁴²la diga lok tin keretna, “Ma nuunu ba, kopmen do at levelinga uga tong i, ketla mila nema axa mara ronga ba i, la maklen ba i do neni Laradi Loklox Arooro ruturun ti limixin at na lavatbung menemen.”

Iesu Ga Lox Aroo Lamdak At Laradi Gomgo

⁴³Melemu at legepu aleng Iesu ga nemen go Saikar, neni ga vas kaxat basinge di la gat pas uto Galili. ⁴⁴Ganoxa ne Iesu ga lok, “Laradi vapaase alii, kopmen di noxo lok ngangao ren to at lenep axa ren.” ⁴⁵Se neni ga vot go Galili, limixin mego diga lok momo aleng min, mila at loxonaleng nedi digat pas uto Jerusalem ti leluxa at Lovovolo Pe, diga ven lempanga axap ne Iesu ga lox i ap mo leluxa.

⁴⁶Iesu gamlong uto Kena at lenep Galili, lemenemen neni ga ba gili laxadan ti lavaen e.

La lara laradi gomgo at la gavaman ga nemen to Kaprenaum la lamdak teren ga meres. ⁴⁷Se neni ga ronga i do ne Iesu ga vot boro Judaia la uto Galili, ni ga vosiga i la ga sing i xusu nat pas uto Kaprenaum la na lox aroo lamdak teren; monga gak midi ameremet. ⁴⁸Iesu ga lok tin, “Kopmen tara atnimi noxo nuunu se do mina ven lempanga sangsangu.”

⁴⁹Laradi gomgo ga lok tin, “Leeme Silok, una emu eburu minia; dola kopmen, lamdak tarak naba met.”

⁵⁰Iesu ga lok tin, “Una onon, lamdak taram naba roo.”

Laradi gomgo ga nuunu at levelinga at ne Iesu la ga vas kaxat. ⁵¹At lavatpas teren uto xolonu lavasaxaruki ren diga xip tangarang kaka i la diga lok tin keretna, “Lamdak taram mo naba roo.”

⁵²La neni ga sue di mi loxonaleng salai lamdak teren ga lox avukat kakalik, la diga lok, “At legesa xonaleng itinongo xanangking mo liplivi ita repes basinge i.” ⁵³La temen lamdak ga doxoma bilong ti levelinga at ne Iesu ga vaase i rin at loxonaleng kerepmo do, “Lamdak taram naba roo.” Kuren la neni eburu minedi axap limixin diga nemen at loogu ren diga nuunu at ne Iesu.

⁵⁴Na lavanga sangsangu, ni lugugu sepsev agepura at lempanga sangsangu ne Iesu ga lox i melemu at laaleng ni ga vas kaxat boro Judaia la uto Galili.

Iesu Ga Lox Aroo Laradi Ro At Ladan

5 ¹Melemu at nai, limixin me Judaia diga lok leluxa silok to Jerusalem la ne Iesu gat pas tin. ²Ap mo lemenemen silok langas povolo silok gak lok, laasen teren ‘Langas Sipsip.’ Ladan kis gak lok

saparav i, laasen teren at lavapaase Ibru do Betsaida; lavalimo lengkon gu mo gak lok. ³Buaang atnedi limixin digak meres la mo digak midi ap mo lavalimo lengkon gu; levengkatli main, la nedi bok di goxo epovo rit pas, la nedi bok lengkot atdi ga molo axap. [Digat kis ngais ladan kusu na vonen kaxat; ⁴mila at leventaba levenaleng laangelo at ne Moroa ga putup ap mo ladan la gak lox avonen i. La do laradi mekmeres ga los tup avot ap mo ladan do ga onen kaxat, neni naba lox avukat basinge lanmeres teren.] ⁵Lara laradi mo ga nemen, lanmeres gak lok teren at lavantun sangaun mi lavanuan maares axap. ⁶Iesu ga ven i gak midi go, la gaklen pam i do mo laradi gak meres at buaang laxanmaares; kuren la ne Iesu ga sue i, “Kereva, u vara box i do una lox avukat?”

⁷Laradi mekmeres ga vorang i rin, “Leeme Silok. Axo ruuna tara nade xusu naba lok li ia ro at ladan kis, do ladan i vonen kaxat. Nia ak lok tong i do anat los tup teren, ketla leventaba vetpes ta giat los tup avot ta ria”.

⁸Melemu ne Iesu ga lok tin, “Katu kaxat, kip kaka lempanga mikmidi ram la una onon.” ⁹Soso mun mo laradi ga lox avukat ta, la ga xip kaka lempanga mikmidi ren la ga vas kaxat.

Na lavanga sangsangu ga vot at laaleng kaala; ¹⁰kuren la luvuttadi amgomgo at limixin me Judaia diga lok ti mo laradi ga lox avukat, “Lingina ni laaleng kaala, la ixok mokso at Lenavolo atdik kusu unap kip lempanga mikmidi ram.”

¹¹La ni ga lok, “Laradi no i lox avukar ia, i tong i ria do ana xip ka lempanga mikmidi rak la ana onon.”

¹²La diga sue i, “Nege nom laradi?”

¹³Ketla laradi no ga lox avukat goxoklen i do nege i mo laradi, mila buaang nedi limixin diga umsu ap mo loxot la ne Iesu no ga vas ekula kaxat pam.

¹⁴Melemu ba, Iesu ga vas panga ka i ro xeneng at loogu laplavang la ga lok, “Una ronga i na. Monga u lox avukat pam. Una xap ta rik lok laxakapmek; lavanga tavanga i lok kapmek aleng ba vot parav u.”

¹⁵Melemu mo laradi ga vas kaxat la ga tong i ri luvuttadi amgomgo at limixin me Judaia, do ne Iesu vam mo ga lox avukar i.

Luvuttadi Amgomgo Diga Puse Ngas Ti Sev Amet Ne Iesu

¹⁶Kuren la luvuttadi amgomgo diga ru ka i xusu dina munepen mi ne Iesu, mila neni ga lox aroo mo laradi at laaleng kaala. ¹⁷Iesu ga lok tidi, “Ne Tamak i gugu at levenaleng amisik se lingina, la nenia bok a gugu.” ¹⁸Na levelinga at ne Iesu ga lox axatu levendoxoma at luvuttadi amgomgo la diga puke ngas kusu dina sev amer i; lavasuun teren do ne Iesu ga lox aroo laradi at laaleng kaala, la neni ga tong i do ne Moroa ni ne Temen, la at na mun i neni ga tong i do neni i epovo mun mi ne Moroa.

¹⁹La ne Iesu ga lok tidi, “A tong tuturun i rinimi, nenia ne Nitna xopmen anak lok tevempanga mi lololos axa rak; nenia ak lok mun

levempanga salai nenia a ven i at ne Tamak. Levempanga salai ne Tamak ik lox i, nenia ne Nitna bok ak lox i. ²⁰Tamak i balamu ia, ne Nitna la ik lox ase ia mi levempanga salai neni axa ik lox i. Neni naba lox ase ia mi levempanga i silok aleng ti mo lempanga sangsangu, la nemi miba sangu aleng. ²¹Tamak ik lox axatu kaxat amlong nedi limixin diga met la im taba nedi mi lorooro; kuren mun la nenia ne Nitna am taba lorooro rinedi, nenia a vara i do ana raba di min. ²²Tamak ga ke xepe lugugu ri ronga linga. Ketla neni ga raba vam ia, ne Nitna mi lololos kusu ri ronga linga, ²³kusu limixin diba lok ngangao rak ne Nitna kerekngan mun di lok ngangao at ne Tamak. Do tara noxo lok ngangao rak ne Nitna, i lok ngan ta do ixo lok ngangao at ne Tamak, mo ga riki ia, ne Nitna ude.

²⁴A tong tuturun i rinimi. Do tara i ronga levelinga rak, la i nuunu ap mo lara ga riki ia, neni ira lok ka vam lorooro avolo. Neni xopmen noxo tu at lavapaase at laaleng ete, ketla ira roo suu vam basinge lanmet la ira ruuna ka vam lorooro avolo. ²⁵A tong tuturun i rinimi. Laaleng mo i auret la nangai ira vot pam la limixin diga met pam diba ronga linga rak, ne Nitna ne Moroa; la do nedi dina ronga res tarak, diba roo. ²⁶Tamak, neni bok lavasuun at lorooro, kuren mun la neni ga lox ia, ne Nitna xusu nenia lavasuun at lorooro. ²⁷La neni ira siam avolo vam ia, ne Nitna xusu anaba ronga linga at laaleng ete, mila nenia Laradi Mevana.

²⁸Nemen mita sangu at nai mila laaleng naba vot la limixin diga met pam diba ronga laxaka tarak, ²⁹la diba ru suu boro at lara maaut atdi; la nedi, diga lok loklok nunuan, diba xatu la dina rooro, la nedi digak lok laxakapmek, diba xatu la dinat pas uto at lemenemen songsongot. ³⁰Nenia axo epovo do ana lok lempanga mi lodoxoma axa rak; a ronga res mun at levelinga ne Moroa i tong i ria. Kuren la mo do nia ana ronga linga, a lox i mi langas i ruturun, mila axo lok tong i do ana lok lugugu xerekngan nia a vara i, ketla a gugu mun mi lodoxoma ap mo lara ga riki ia ude.

Lempapaase Aru Mumu Ne Iesu

³¹Do nenia xusuk ana paase aru axa ia, levelinga nia a vaase i, noxo mumuat. ³²Ketla ne Moroa i paase aru ia, la aklen i do mo levelinga ni i paase mu ia min, i ruturun. ³³Miga riki luvuttadi vapaase atnimi uto at ne Jon, la ni ga tong asu levelinga ruturun mumu ia. ³⁴Axok pakes ti levelinga at tentaba vetpes kusu ri lox axasev i do nia nege; ketla a tong na levelinga at ne Jon kusu nemi mina siam ka i la ne Moroa naba lox arooro nimi. ³⁵Jon ga tong asu levelinga at ne Moroa la kerepmo ni ga lok ngan lababao i lox asu laxasep, la at leventaba leven gaaling miga lok momo ren.

³⁶Ketla a ruuna levelinga mumu ia la i silok aleng ti levelinga ne Jon ga tong asu i. Leven gugu nia a lox i, ni leven gugu ne Tamak ga raba

ia min; anai levempanga nia a lox i, i lox asuusu i do ne Tamak ga riki ia. ³⁷La ne Tamak, mo ga riki ia, neni bok i paase aru ia. Nemi mi goxo ronga xibis tinotno laxaka ren, kopla mi gita ven labantuxu ren. ³⁸La nemi mi goxom tebeng tu avarang at levelinga ren keneng at lorooro atnemi, mila nemi mi goxo nuunu rak, no neni ga riki ia ude. ³⁹Mi reven mumu amisik Lovoang Kaala mila mi doxoma i do keneng teren miba vuse ka lorooro avolo. La mo levelinga i paase mumu ia. ⁴⁰Ketla nemi xa mi xopara na nuunu rak kusu miba lok ka lorooro.

⁴¹Nia a goxo vot de xusu ti lok ka leemi asu. ⁴²Ketla akleklen lebelen nimi. Aklen i do labalamu ri ne Moroa xopmen na nemen keneng at lebelen nimi. ⁴³Agara vot eburu vam mi lololos at ne Tamak, ketla kopmen mina siam ka ia. Do tara na paase mi lololos axa ren, nemi miba siam ka i. ⁴⁴Mi vavara i xusu miba lok ka leemi asu boro atnemi xa, ketla mi xopara i do mina lolos ka lomomo ri ne Moroa; la neni Lomoroa xusuk mun, kusu neni naba emi asu minimi. Kuren la i lolos aleng kusu mina nuunu.

⁴⁵Nemen mita doma i do nia anaba sok taba nimi mi levelinga ro melamgo at ne Tamak do nemi miga lok laxapmek. Ne Moses axa neni naba sok taba nemi mi levelinga, mila nemi mi nunua i do ne Moses naba lok tooro nemi. ⁴⁶Do nemi mi nuunu ruturun at levelinga at ne Moses, miba nuunu ruturun tarak, mila neni ga malagan mo levelinga mumu ia. ⁴⁷Ketla mo do mixo nuunu at levelinga ren, miba nuunu ba xereva at levelinga rak?”

Iesu Ga Raba Luxa Buaang Limixin
(*Mt 14:13-21; Mk 6:30-44; Lu 9:10-17*)

6 ¹Melemu at nai Iesu gamlong polo manga at lavatdan kis Galili. (Laasen bok teren Tiberias.) ²La buaang nedi limixin diga mumu asu i, mila digara ven pam levempanga sangsangu neni ga lox i ri lox avukat nedi digak meres. ³Melemu ne Iesu ga vas urut uto vana at loxongkaana la ga xis eburu mi luvuttadi loklok ka anasa ren. ⁴Leluxa silok at limixin me Judaia diga so asen i do Lovovolo Pe mo nga ga auret.

⁵Iesu ga milik tangtagap la ga ven i do, buaang nedi limixin mo digat pas kusu dina vot pasa i, kuren la ni ga sue ne Pilip, “Ataba un kaka teveluxa ua xusu ba epovo ri na limixin?” ⁶Ni ga tong i na xusu ri lok tong pen ne Pilip; neni gaklen pam lai neni naba lox i.

⁷Pilip ga vorang i rin, “Ixo epovo xusu ata un kaka tevengkongkide mi tegepu sangaun kobot (200) denarias kusu ridi ri anan.”

⁸Laradi loklok ka anasa at ne Iesu, laasen teren ne Endru, neton ne Simon Pita ga lok, ⁹“Lara lamdak na, i ruuna lavalimo lengkongkide xakalik at levempiao bali la luemat kakalik. Ketla noxo epovo ri na limixin solo.”

¹⁰La ne Iesu ga lok ti luvuttadi loklok ka anasa ren, “Mina tong i ri limixin kusu dina xis kopok.”

Mo lenep ga umsu mi laxampivilis. Kuren la limixin diga xis kopok; nedi lavatlok axap diga epovo at lavalimo larabin sangsangaun kobot (5000). ¹¹Iesu ga lok ka loxongkide, la ga tong loklox avukat, la digam taba mo limixin min digat kis. Ni ga tong avukat bok ti ne Moroa mi luemat la ga raba bok limixin min, la nedi axap diga an mais ga epovo at lavavara atnedi.

¹²Se diga an mais axap, Iesu ga lok ti luvuttadi loklok ka anasa ren, “Mina lok ka bubua lengkon atat luxa; nemen dik ata ke xepe tengkot.”

¹³Kuren la diga lok kaka bubua axap nom lengkon atat luxa, la diga suxa aumsu lasangaun mi legepura leventat min boro at nom lavalimo lengkongkide at lempiao bali, mo limixin diga anan i.

¹⁴Mo limixin go diga ven mo lavanga sangsangu ne Iesu ga lox i, la diga lok, “I ruturun aleng; neni mo leeme vapaase alii diga tong i do naba vot at na lavatbung menemen!” ¹⁵Iesu gaklen pam i do limixin mo diba vot pasa i la dina lok kaka i, kusu dina pu soso i ngan loorong silok tidi; kuren la neni xusuk ga vas kaxat uto at lengkongkaana vetpes.

Iesu Gat Pas To Mavana At Lavatdan Kis Galili

(Mt 14:22-33; Mk 6:45-52)

¹⁶Ga ukantinao bukboxumin, luvuttadi loklok ka anasa at ne Iesu diga vas si uto xopok at lavatdan kis, ¹⁷la diga los kas at lesebang la diga sen bilong at lavatdan kis uto Kaprenaum. Lavanga mo garang bungmain ta, la ne Iesu goxovisi vosiga di. ¹⁸Langsangan lamanman lolos gat mas la ga lok ladan ga rem ekapus. ¹⁹Luvuttadi loklok ka anasa digatla uto vaxalom la diga ven ne Iesu gat pas to mavana at lavatdan kis uto saparap di. La diga marat aleng. ²⁰Iesu ga lok tidi, “Nemen mita marat. Nenia mun na!” ²¹La diga mulus ka i uto at lesebang; la soso mun lesebang ga oso uto loxon ap mo loxot nedi diga sesen tin.

Limixin Diga Puke Ri Ne Iesu

²²Ap mo manga lara laaleng petpes, limixin no diga nemen to ap mo lenep ne Iesu ga raba nedi mi leveluxa e, diga ven i do legesa sepang mun mo ga nemen. Digaklen i do ne Iesu goxo emu eburu mi luvuttadi loklok ka anasa ren ap mo lesebang, la luvuttadi loklok ka anasa xusuk mun diga sesen. ²³Melemu leventaba lesebang boro Tiberias diga oso go saparap mo lenep limixin diga anan lengkongkide e, melemu at Leeme Silok ga tong avukat ti ne Moroa. ²⁴Se limixin diga ven i do Iesu goxok lox e, la luvuttadi loklok ka anasa ren bok, diga los kas at levesepang la diga sen uto Kaprenaum, kusu dina reven tin.

Iesu Neni Lakde At Lorooro

²⁵Se limixin diga long lenget ne Iesu to Kaprenaum, diga lok tin, “Leeme loklox ase, u vot de lingisa?” ²⁶Iesu ga vorang i ridi xeretna,

“A tong tuturun i rinimi. Mi reven pupuse ria mila miga anan levengkongkide la nemi axap miga an mais teren, ketla kopmen do miga xasep avukat at lavasuun at levempanga sangsangu nenia aga lox i. ²⁷Nemen mita gugu ri leveluxa ua naba sonao soso; ketla mina gugu lolos ti leveluxa i nemen amisik ti lorooro avolo. Na leveluxa, nenia, Laradi Mevana, anaba raba nemi min, mila ne Moroa ne Temen dik ira soxolik ka vam ia.”

²⁸Kuren la diga sue i, “Maba lok lavanga salai xusu manaba lox epovo lavanga ne Moroa i vara i do maba lox i?”

²⁹Iesu ga vorang i ridi xeretna, “Lavanga ne Moroa i vara i xusu mina lox i, i lok keretna; mina nuunu ap mo lara ne Moroa ga riki i.”

³⁰La diga sue rin keretna, “Lavanga sangsangu sala uba lox i xusu maba ven i la mana nuunu ba ram? Uba lok lavanga salai? ³¹Lavalabat atnama diga anan leveluxa at ne Moroa ro at lamatbin laasen teren lamaana, kerekngan Lovoang Kaala i tong i do, ‘Ni ga raba nedi mi levengkide boro vana at laxalibet.”

³²Iesu ga lok tidi, “A tong tuturun i rinimi. Ne Moses goxo raba nemi mi lakde boro vana at laxalibet, ketla ne Tamak axa im taba nemi mi lakde ruturun boro vana at laxalibet. ³³Mo lakde ne Moroa i raba i, neni i ngan mo lara ga si boro vana at laxalibet la im taba lorooro ri limixin at na lavatbung menemen.”

³⁴Diga lok, “Leeme Silok. I ru ka nga i mo lingina la melemu una raba amisik nema mi nom lakde.”

³⁵Iesu ga lok tidi, “Nenia lakde at lorooro. Mo do tara na vosiga ia, neni noxo roxo bok ba; la neni do i nuunu rak, neni noxo minu bok ba. ³⁶A tong i rinimi do mira ven pam ia, ketla kopmen mina nuunu rak, kerekngan a tong pam i rinimi. ³⁷Nedi axap ne Tamak i raba ia midi, dinaba vosiga ia. La do tara na vosiga ia, nenia noxo sok tixirixes i. ³⁸Nenia agoxo si boro vana at laxalibet do ti mu asu lavavara rak, ketla ti lox epovo lavavara ap mo lara ga riki ia ude. ³⁹Lavavara ap mo lara ga riki ia, i lok keretna; nenia noxo ke asoogong tegesara atdi limixin neni ga raba vam ia midi, la anaba lox aroo xat di at laaleng ete; ⁴⁰mila lavavara at ne Tamak i lok keretna, nedi do di ven kisip ne Nitna ne Moroa la di nuunu ren, dinaba lok ka lorooro avolo, la nia anaba lox aroo xat di at laaleng ete.”

⁴¹Limixin amgomgo diga epaase xuxurung mumu ne Iesu, mila neni ga lok do, “Nenia lakde aga si boro vana at laxalibet.” ⁴²Diga lok, “Neni mun ne Iesu, nitna ne Josep la ne Maria. Nedik taklen ne temen mi nenen. I lok kereva la neni i tong i do ni ga si boro vana at laxalibet?”

⁴³La ne Iesu ga vorang i ridi xeretna, “Na xap ta nimi at lavapaase xuxurung kantubu atnimi. ⁴⁴Kopmen tara i epovo na vosiga ia, se do ne Tamak na sat ka i ude saparav ia; la nia aba lox aroo xar i at laaleng ete. ⁴⁵Lavaeme vapaase alii diga malagan li levelinga xeretna,

'Limixin axap, ne Moroa naba anasa di.'

Ais 54:13

Nedi axap do di ronga ne Tamak la dia lok kaka loklox anasa ren, nedi diba vosiga ia. ⁴⁶Kovisi tara na ven ne Tamak; nenia aga laa boro at ne Moroa, nenia xusuk mun agara ven pam ne Tamak. ⁴⁷A tong tuturun i rinimi; do tara na nuunu rak, neni naba ruuna ka lorooro avolo. ⁴⁸Nenia lakde at lorooro. ⁴⁹Lavalabat atnimi diga anan leveluxa at ne Moroa ro at lamatbin, la diga met. ⁵⁰Ketla na lakde ga si boro vana at laxalibet, ni i lok petpes; la do tara na anan teren, neni noxo met. ⁵¹Nenia lakde at lorooro la aga si boro vana at laxalibet. Do tara na anan at na lakde, neni naba rooro amisik. Na lakde, ni levenuut tarak. Aba raba i ri limixin axap kusu diba rooro."

⁵²Anai levelinga ga vaxaru kaxat ka lavapaase mukmusak kantubu at luvuttadi amgomgo la diga esue xeretna, "Na laradi ba raba dik mi levenuut teren kereva xusu ri anan?"

⁵³Iesu ga lok tidi, "A tong tuturun i rinimi. Do mi noxo anan at levenuut tarak, Laradi Mevana, la mi noxo inin at lada rak, mi noxo ruuna ka lorooro. ⁵⁴Do tara na anan at levenuut tarak la na inin at lada rak, neni ira ruuna ka vam lorooro avolo, la nia anaba lox aroo xar i at laaleng ete. ⁵⁵Levenuut tarak ni leveluxa ruturun, lada rak ni laxadan tuturun ti inin. ⁵⁶Do tara na anan at levenuut tarak la na in at lada rak, neni i nemen tarak la nia a nemen teren. ⁵⁷Ne Tamak neni im taba lorooro, neni ga riki ia, la keneng mun teren, la nenia bok a rooro. Kuren la, do tara na anan at levenuut tarak, neni naba ruuna ka lorooro xeneng mun tarak. ⁵⁸Anai ni lakde ga si boro vana at laxalibet; ixo lok ngan lakde, lavalabat atdik diga anan i, ketla melemu diga met. Do tara na anan at na lakde, neni naba rooro amisik." ⁵⁹Iesu ga tong asu mo levelinga at laaleng neni ga anasa ro at loogu singising to Kaprenaum.

Luvuttadi Loklok Ka Anasa Diga On Basinge Ne Iesu

⁶⁰Buaang atnedi luvuttadi loklok ka anasa at ne Iesu diga ronga i na la diga lok, "Anai levenanasa i lolos tinotno. Nege i epovo na siam ka i?"

⁶¹Iesu gaklen pam i do luvuttadi loklok ka anasa ren diga paase kuxurung mumu na levelinga ren. La ni ga sue di, "Kereva, na levelinga i lok kapmek lebelen nimi? ⁶²Kereva, dola mina ven ia, Laradi Mevana, ana urut uto vana, minaba siam ka ba levenanasa rak? ⁶³Loroonan Kaala im taba limixin mi lorooro; levenuut kusuk mun kopmen na epovo na lok tooro di. Levelinga nenia a vaase vam nimi min, neni levelinga at Loroonan kaala la at lorooro. ⁶⁴Ketla leventaba atnimi move xopmen dina nuunu rak mi lunuunu atdi."

At lavakpaxaru kaxat at lugugu ren, Iesu gaklen pam nege nedi leventaba di goxo nuunu ren, la nege mo lara naba song araba i ri limixin kapmek. ⁶⁵La ni ga lok bok keretna, "Ni na levelinga neni lavasuun teren

la nia ara tong i rinimi do tara noxo vosiga ia se ne Tamak na lox avolo i xusu neni na nuunu rak.”

⁶⁶Melemu at nai, buaang atnedi luvuttadi loklok ka anasa ren digamlong basinge i la kopmen bok ba di goxo emu eburu min.

⁶⁷La ne Iesu ga sue lasangaun mi legepura luvuttadi loklok ka anasa ren keretna, “La nemi bok mi vara i do minamlong?”

⁶⁸Simon Pita ga vorang i rin keretna, “Leeme Silok, kopmen bok ba tara mabat kis esogo min. Nenu xusuk mun u ruuna levelinga im taba lороoro avolo. ⁶⁹La monga ma nuunu la maklen i do nenu laradi melemelengan boro at ne Moroa.”

⁷⁰Iesu ga lok tidi, “Nia aga soxolik ka nemi lasangaun mi legepura ngan luvuttadi loklok ka anasa rak. Ketla legesara atnimi ni lamdak at ne Satan.” ⁷¹Iesu ga tong asu i na mumu ne Judas, lamdak at ne Simon Iskariot; Judas neni lara atnedi lasangaun mi legepura luvuttadi loklok ka anasa, la ga song araba ne Iesu ri limixin kapmek.

Iesu Mi Luvutneton

7 ¹Melemu at nai, Iesu gat pas at levenmenemen to Galili; ni goxo vara i xusu nat pas to Judaia, mila luvuttadi amgomgo diga vara i xusu dina sev amer i. ²Lara leluxa at leme Judaia mo ga sixit auret ta. Laasen at na leluxa do, ‘Leluxa at Laraugu Xukuxut.’ ³Luvutneton ne Iesu diga lok tin, “Una vas kaxat basinge na loxot, la unat pas uto Judaia ti mo leluxa, kusu luvuttadi loklok ka anasa ram diba ven levempanga sangsangu uba lox i. ⁴Do u vara i do limixin dinaklen u, nemen uta nemen alipe. Nenu uk lok levempanga sangsangu, kuren la una lox asuvos u ri limixin axap.” ⁵Diga tong asu i na mila kopmen tara atdi luvutneton ne Iesu ga nuunu ren.

⁶La ne Iesu ga lok tidi, “Loxonaleng ti lox asuvos ia xovisi na vot. I epovo do nemi minat pas uto at leluxa, ⁷mila limixin at lavatkangka di noxo musak nimi; ketla diba musax ia, mila nia a tong amisix i do loklok atdi i lok kapmek. ⁸Minat pas ti mo leluxa. Nenia noxot pas soso rin, mila loxonaleng ti lox asuvos ia xovisi na vot.” ⁹Ni ga tong i na, la neni ga nemen go Galili.

Iesu Gak Lok At Leluxa At Laraugu Xukuxut

¹⁰Melemu at luvutneton digat pas uto at leluxa, Iesu bok gat pas. Kusuk mun neni goxot pas asuvos, ni gat pas epep mun kusu limixin di noxoklen i do neni mo gak lok ap mo leluxa. ¹¹Luvuttadi amgomgo diga reven tin go at leluxa, la diga susue mo limixin diga vot go at leluxa, “Ua nga i no?”

¹²Buaang atnedi limixin diga paase siksikma mu ne Iesu. La leventaba luvuttadi diga lok, “Neni lagale laradi.”

Leventaba diga lok, “Kopmen, neni i sasar asoogong buang limixin.”
 13Ketla kopmen teta goxo paase mumu i at lasaxaven, mila diga marat at luvuttadi amgomgo.

14At laaleng sev avanuet ap mo leluxa, Iesu ga beles to xeneng at loogu laplavang la ga ru ka i xusu na anasa limixin. 15Luvuttadi amgomgo diga sangu aleng la diga esue, “Na laradi goxot pas ti loklox ase la ga lok ka na lakleklen meva?”

16Iesu ga vorang i ridi, “Lavanga salai nia a anasa min kopmen at lakleklen tarak, ketla boro ap mo laradi ga riki ia ude. 17Do tara i vara i do na lok levempanga ne Moroa i vara i, neni nabaklen kibis ka i do nenia a anasa mi levelinga boro at ne Moroa, kopla a paase aru mene nga ia mi lololos tarak. 18Laradi do i paase aru xa i, neni i ngan do i lox asilok axa i. Do tara i vara i do na lox asilok mo lara ga riki i, neni i paase ruturun la kopmen taxaxarang na nemen teren. 19Moses ga raba nemi mi Lenavolo. Ketla kopmen teta atnimi ik lox epovo na Lenavolo. La tila ba mik lok tong pen i do mina sev amer ia?”

20La limixin diga lok, “Lagas kapmek i nemen keneng taram! Nege nga mo ik lok do nap sev amer u?”

21La ne Iesu ga vorang i ridi xeretna, “Aga lok legesa vanga sangsangu la nemi axap miga sangu. 22Moses ga tong i rinimi do mina rivit kepe levengkontuxu at laxamdak atnimi. Kopmen ne Moses ketla lavalabat atnimi mo diga vaxaru ka i; miba vit kepe levengkontuxu at laxamdak lixilik atnimi at laaleng kaala. 23Mo do mina vit tamdak at laaleng kaala xusu mi noxo los polo Lenavolo, tila mi musak mila nia ga lox aroo laradi at laaleng kaala? 24Nemen mita ila mumu ia mi lodoxoma at na lavatkangka, ketla mina ila mumu ia mi lodoxoma avukat boro at ne Moroa.”

Agut Neni Na Lanarong

25Ap mo loxonaleng leventaba luvuttadi go Jerusalem diga lok, “Agut neni vam na laradi, luvuttadi amgomgo di lok do na sev amer i. 26Mina ven ba i neni i anasa at lemeren limixin axap. La kopmen tara na paase tangarang i. Agut limixin amgomgo diklen i do neni Lanarong. 27Ketla do Lanarong na vot, teta noxoklen i do neni meva. La nedik ataklen na laradi do neni ga laa meva.”

28La at loxonaleng ne Iesu ga anasa ro at loogu laplavang, neni ga vaase lolos keretna, “I ruturun do nemi miklen ia, la miklen i do nia aga laa meva. Ketla agoxot pas ude at lavavara axa rak. Mo lara ga riki ia, neni luruturun. La nemi mixoklen i. 29Ketla nenia aklen i, mila nenia agat pas boro ren la neni ga riki ia ude.”

30Melemu diga lok tong i do dina ranga alis i, ketla kopmen teta goxo long tu ren, mila loxonaleng teren goxovisi epovo. 31Ketla buang atnedi

limixin diga nuunu ren diga lok keretna, “Na laradi i lok lempanga sangsangu i silok aleng, kuren la ixo epovo do tara vetpes na vot ngan Lanarong la na lok lempanga i silok tin?”

Luvuttadi Amgomgo Diga Riki Lentaba Uto Saparap Ne Iesu

³²Lubung Parisi diga rongga limixin diga paase siksikma mu ne Iesu la levelinga ni ga tong i. Kuren la nedi eburu mi lavamaasa silok diga riki leventaba luvuttadi rutu mu at loogu laplavang uto at ne Iesu xusu dina ranga alis ka i.

³³Iesu ga lok, “A noxo nemen abao eburu minimi la melemu ba anat pas ba uto saparap mo lara ga riki ia. ³⁴Miba reven tia, ketla minoxo vuse ka ia, mila lenep nia ana nemen teren, nemi mixo epovo do minat pas uve.”

³⁵Luvuttadi amgomgo diga epaase xantubu atdi xeretna, “I lok do ni mo nat pas ua xusu nedik noxo vuse ka i. Agut neni nabat pas uto at tara temenemen silok at limixin boro Grik; no limixin me Judaia dik lox e la neni naba anasa limixin boro Grik. ³⁶Neni i lok do, ‘Miba reven tia, ketla mi noxo vuse ka ia.’ La i lok bok do, ‘Nemi mixo epovo do minat pas ti mo loxot nenia aba nemen e.’ Ua lavasuun at na levelinga?”

Ladan Im Taba Lorooro

³⁷At laaleng kavaxap ap mo leluxa ni laaleng silok. At mo laaleng, ne Iesu ga ru upana la ga xup lolos keretna, “Do tara go i minu, neni na vosiga ia la na inin. ³⁸I ngan Lovoang Kaala i lok, ‘Do tara na nuunu rak, laxadan im taba lorooro naba sesen su boro xeneng at lorooro ren.’ ³⁹Iesu ga vaase i na mumu Loroonan Kaala. Nedi diga nuunu at ne Iesu, diga ruuna ka i. Ap mo levenaleng ne Moroa goxovisi raba Loroonan Kaala, mila ne Iesu goxovisi urut uto vana ri lixitkis orong teren.

Limixin Diga Paase Mumu Ne Iesu La Diga Epeseves

⁴⁰Buaang atnedi limixin keneng ap mo laneelen diga rongga ne Iesu ga tong na levelinga la diga lok, “I ruturun aleng do na laradi, neni mo leeme vapaase alii, ne Moses ga paase alii min.”

⁴¹La leventaba diga lok keretna, “Neni Lanarong.”

Ketla leventaba vetpes diga lok, “Lanarong noxo laa boro Galili.

⁴²Lovoang Kaala i tong i do Lanarong naba vot boro at libibinat at ne Devit, la diba visix i ro Betilem, lemenemen ne Devit gak lox e.” ⁴³Kuren la limixin diga epeseves mumu ne Iesu. ⁴⁴Leventaba diga lok do dina ranga alis i, ketla kopmen teta goxo long tu ren.

Luvuttadi Amgomgo Di Goxo Nuunu At Ne Iesu

⁴⁵Luvuttadi rutu mu at loogu laplavang digamlong uto saparap lavamaasa silok mi lubung Parisi, la lavamaasa silok mi lubung Parisi diga lok, “Tila mixo lok ka i ude?”

⁴⁶La luvuttadi rutu mu at loogu laplavang diga lok, “Kopmen tara i paase asu levelinga mumuat kerekngan mo laradi.”

⁴⁷La lubung Parisi diga lok, “Kereva, i bala vukpuk bok nemi?”

⁴⁸Kereva, tara at luvuttadi amgomgo kopla tara at lubung Parisi go i nuunu ren? ⁴⁹Kopmen tinotno! Ana limixin kopmen dinaklen tempanga xeneng at Lenavolo at ne Moses, kuren la lasaxaek i mumu di.”

⁵⁰Nikodimas neni lara atdi, no migo neni ga vosiga ne Iesu at lara laxanimin. Neni ga lok tidi, ⁵¹“At Lenavolo atdik ata xo lok li lumumuat mavana at tara, se do dia ronga linga vam teren kusu ri vuse ka lai neni ga lox i.”

⁵²Diga vorang levelinga ren mi levelinga mukmusak, diga lok keretna, “Agut nenu bok laradi gamasa boro Galili? Una ven avukat Lovoang kaala la uba xasep do kopmen teeme vapaase alii naba vot boro Galili.” ⁵³[Melemu nedi axap diga epeseves la digat pas ukolonu.

Diga Long Lenget Ka Latkin Ga Longka

8 ¹La nedi digat pas uto xolonu atdi getgesara, ketla ne Iesu gat pas uto at Lakaana Olip. ²Ga maxantamak suubu ap mo lara laaleng petpes, neni gat pas uto at loogu laplavang. La nedi limixin axap diga tu bubua kangkan i, la ni ga xis kopok la ga anasa di. ³La luvuttadi loklox ase at Lenavolo eburu mi lubung Parisi diga lam abeles lara latkin, diga long lenget ka i ga longka; la diga vaxaru li i ro melamgo atdi axap. ⁴Diga lok ti ne Iesu, “Laradi loklox ase. Na latkin neni i epot la ma long lenget ka i, i longka lara latlok kopmen ateren. ⁵At Lenavolo, ne Moses ga raba lara lavapaase lolos do tara tatkin na lok na loklok, taba lu amer i mi laxanuat. Ua levelinga ram ti na loklok?” ⁶Diga tong i na xusu ri lok tong ne Iesu mila diga vara i xusu dina bala raba i.

Ketla ne Iesu ga rikbu si la ga malagan to xopok at laxangka mi lisivisip teren. ⁷Diga tu go la diga susue ne Iesu mi levesusue, la neni ga ru urut akmokso upana la ga lok tidi, “Do tara atnimi goxovisi lok taxapmek, neni na lok ka tuat la na lu avot na latkin.” ⁸La neni ga rikbu manga la ga malagan manga ro xopok at laxangka.

⁹Se diga ronga i na, digat pas kaxat sisi basinge mo loxot, luvuttadi mukun avot; la melemu ne Iesu xusuk mun ga nemen eburu mi latkin move ga tu go. ¹⁰Iesu ga ru urut la ga lok tin, “Latkin. Ua nga di no? Kereva, tara gove i nemen kusu na vaxaru u at lavapaase?”

¹¹La mo latkin ga lok tin, “Kopmen teta, Leeme Silok.”

Iesu ga lok tin, “Nenia bok kopmen ana vaxaru u at lavapaase. Una onon, ketla nemen uta lok bok ba taxakapmek.”]

Iesu Ni Laxasep Ti Lavatbung Menemen.

¹²La ne Iesu ga vaase manga ri limixin keretna, “Nia laxasep at na lavatbung menemen. Do tara na nuunu rak, neni naba ruuna ka laxasep at lороoro, la kopmen noxot pas at lamain.”

¹³La lubung Parisi diga lok tin, “Nenu u paase aru axa u, la levelinga ram kopmen nak mokso.”

¹⁴Iesu ga vorang i ridi xeretna, “Keke i do nia a paase aru axa ia, ketla levelinga rak i ruturun, mila nenia aklen lemenemen nenia aga vas kaxat meve la anabat pas bok uve. Kopmen minaklen lemenemen nenia aga vas kaxat teren la ti lenep nenia abat pas tin. ¹⁵Nemi mi ila mumu limixin mi lodoxoma at na lavatkangka, ketla nia anoxo ila mumu loklok at tara. ¹⁶Ket do nia ana ila mumu loklok at tara, levelinga rak naba ruturun; mila kopmen nenia xusuk a tong mo levelinga, ketla ne Tamak ga riki ia, neni ik lox amumuat levelinga rak. ¹⁷Levelinga ro xeneng at Lenavolo atnimi i lok keretna; do legepu radi dina siam at tevelinga, mo levelinga i ruturun. ¹⁸Nenia a paase aru axa ia, la ne Tamak bok ga riki ia, i paase aru box ia.”

¹⁹Diga sue i, “Ne Tamam ua?”

La ne Iesu ga lok, “Mixoklen ia la ne Tamak. Mo do minaklen ia, mibaklen bok ne Tamak.” ²⁰Iesu ga tong na levelinga at loxonaleng neni ga anasa limixin to xeneng at loogu laplavang, to at loxot, levempanga lili pilas ga nemen e. Ketla kopmen tara goxo ranga alis i, mila loxonaleng tin goxovisi epovo.

Mi Noxot Pas Ti Mo Lenep Nenia Anabat Pas Uve

²¹Iesu ga lok manga ridi xeretna, “Anaba onon basinge nimi, la miba reven tia; ketla miba seeve nop laxakapmek atnimi, la mixo epovo do minat pas ti mo lemenemen nenia anabat pas uve.”

²²Luvuttadi amgomgo diga lok tidi xa xeretna, “Neni i lok do, ‘Nedik dixo epovo rit pas ti mo lenep neni nabat pas uve.’ Ua lavasuun at na levelinga? Agut i lok do neni naba sev amet axa i.”

²³Iesu ga vorang i ridi xeretna, “Nemi limixin mede xopok, nenia boro vana; nemi limixin at na lavatkangka, ketla nenia xopmen mede xopox ia. ²⁴Kuren la a tong i rinimi do nemi miba seeve mumu laxakapmek atnimi. Do mixo nuunu do nenia mo a tong pam i rinimi, miba seeve mumu laxakapmek atnimi.”

²⁵La diga sue i, “Nenu nege?”

Iesu ga vorang i ridi xeretna, “Nia ara tong pam i rinimi. ²⁶At laaleng ete nenia aba ruuna laxampapaase solo mumu laxakapmek atnimi. Mo lara ga riki ia ude, neni luruturun, la mo levelinga ni ga raba ia min, nia a tong asu i ri limixin axap at na lavatbung menemen.”

²⁷Di goxo xasep do ne Iesu ga paase ridi mumu ne Temen. ²⁸Kuren la ne Iesu ga lok tidi, “Se do mina xip aurur ia, Laradi Mevana, ro vana at laxaba, mibaklen ba i do nenia nege la mibaklen ba i do nenia axo lok levempanga mi lavavara axa rak, ketla a vaase mun mo levelinga ne Tamak ga raba ia min. ²⁹La mo laradi ga riki ia ude, mo ik lox eburu

minia, ixo ke xepe xusux ia, mila nenia ak lok amisik levempanga i lox amomo i.” ³⁰Buaang atnedi limixin diga ronga ne Iesu ga tong asu na levelinga diga nuunu ren.

Nege Laxamdak At Ne Abaram?

³¹Kuren la ne Iesu ga lok ti leme Judaia mo diga nuunu vam teren, “Dola minam tebeng levenanasa rak, ba raturun do nemi luvuttadi loklok ka anasa rak. ³²La kerepmo mibaklen levelinga raturun at lorooro, la mo levelinga naba lox asepmus nemi.”

³³La diga lok, “Nema livipisik li at ne Abaram, la kovisi toxonaleng ma nemen ngan lavaanat saxaruki at teta. Ua lavasuun at nom levelinga ram u tong i do, maba sepmus?”

³⁴Iesu ga lok tidi, “A tong tuturun i rinimi. Do tara i lok laxapmek, neni lasaxaruki at laxapmek. ³⁵Lasaxaruki neni noxo epovo xusu neni lara xeneng ap mo lixitkis koetemen, ketla neni i gugu mene ridi. Ketla lamdak ap mo loxoetemen, neni i nemen amisik keneng at lixitkis koetemen. ³⁶Do nenia, ne Nitna na lox asepmus nemi, nemi miba sepmus tuturun. ³⁷Aklen i do nemi livipisik li at ne Abaram. Ketla nemi move mi doma i do mina sev amer ia, mila levelinga rak kopmen na nemen aulis keneng at lorooro atnimi. ³⁸A paase mumu levempanga ne Tamak ga lox ase ia min, ketla nemi mik lok levempanga ne temen nemi ik lox i.”

³⁹Diga lok tin keretna, “Temen nema ne Abaram.”

Iesu ga vorang i ridi xeretna, “Do nemi laxamdak tuturun at ne Abaram, miba lok leven gugu nunuan kerekngan ne Abaram ga lox i. ⁴⁰Nenia a tong asu mun levelinga raturun aga ronga i boro at ne Moroa la mi vara aleng i do mina sev amer ia; ne Abaram goxo lok tevempanga xerepmo. ⁴¹Nemi mik lok levempanga ngan ne temen nemi ik lox i.”

Diga lok, “Ne Moroa xusuk mun neni ne temen nama. La nema laxamdak tuturun teren.”

Luvutnitna Ne Satan

⁴²Iesu ga lok tidi xeretna, “Dola ne Moroa ne Temen nemi, nemi minaba balamu ia mila nenia aga laa boro at ne Moroa la monga nenia ak lok de. A goxo vas kaxat mi lodoxoma axa rak, ketla ne Moroa ga riki ia. ⁴³Tila mixo xasep at levelinga rak? Lavasuun teren keretna, nemi mixo epovo do mina siam ka levelinga rak. ⁴⁴Nemi laxamdak at ne temen nemi, ne Satan. La mi vavara i do mina mumu asu lavavara at ne temen nemi. Ga ru ka i at lurutu kaxat neni laradi sepsev amet tadi. La neni xopmen na tu at luruturun, mila kopmen turuturun keneng teren. Do neni i vaase laxaxarang, neni ik lok mene levempanga i epovo rin, mila neni laradi xaxarang, la neni lavasuun at laxaxarang. ⁴⁵A paase raturun, kuren la mixo nuunu rak. ⁴⁶Kopmen tara atnimi i epovo na lox asuusu i

do nenia aga bixurun mi laxakapmek. Dola a paase ruturun, tila ba mi xopara na nuunu rak? ⁴⁷Laradi i laa boro at ne Moroa, neni nang tonga levelinga at ne Moroa. Nemi xopmen boro at ne Moroa, mila kopmen minang tonga levelinga ren.”

Iesu La Ne Abaram

⁴⁸Luvuttadi amgomgo diga lok ti ne Iesu xeretna, “Nenu laradi boro Samaria la lagas i nemen taram.”

⁴⁹Iesu ga vorang i ridi xeretna, “Lagas kopmen na nemen tarak, a lok ngangao at ne Tamak, ketla nemi mixo lok ngangao rak. ⁵⁰Axo vara i do ana lox asilox ia xusu limixin diba lok ngangao rak. Ketla ne Moroa i vara i do limixin na lok ngangao rak la neni leeme rongtonga linga. ⁵¹A tong tuturun i rinimi. Do tara na ronga res at levelinga rak, neni noxo seeve.”

⁵²Luvuttadi amgomgo diga lok tin, “Anaa maklen ba i do lagas i nemen taram. Abaram ga met, la lavaeme vapaase alii bok diga met, la u lok keretna, do tara na ronga res at levelinga ram, kopmen noxo met. ⁵³Temen nema ne Abaram ga met, la nenu u tong i do u silok ti ne Abaram, la lavaeme vapaase alii bok diga met. U doxoma ba i do nenu nege?”

⁵⁴Iesu ga vorang i ridi xeretna, “Dola nenia ana lok asilox ia, levelinga rak naba lok ngan lavanga gamasa. Ketla ne Tamak ik lox asilox ia. Nemi mi tong i do neni ne Moroa atnimi. ⁵⁵Nemi xa xopmen minat kis ekilen mi ne Moroa, ketla nenia at kis ekilen min. Dola nia gita tong i do nia xopmen anat kis ekilen min, nenia a lok ngan laradi xaxarang, kerekngan nimi. Ketla nenia at kis ekilen min, la ang tonga res at levelinga ren. ⁵⁶Temen nemi ne Abaram ga lok momo aleng do neni naba ven lovtopot tarak, neni ga ven i la ga lok momo.”

⁵⁷Luvuttadi amgomgo diga lok tin, “Nenu xovisi lavalimo sangaun maares taram. La tila u tong i do uga ven pam ne Abaram?”

⁵⁸Iesu ga vorang i ridi xeretna, “A tong tuturun i rinimi. Gano ne Abaram goxovisi vot, nenia mo aga nemen pam.” ⁵⁹Diga ranga ka laxanuat do ri lu ne Iesu; ketla neni ga vas ekula kaxat la ga on basinge loogu laplavang.

Iesu Ga Lox Axasep Luxatli Main At Laradi

9 ¹At lara laaleng Iesu gat pas at langa, la ni ga ven lara laradi luxatli ren ga main, nenen ga visik axa i min kuren. ²La luvuttadi loklok ka anasa at ne Iesu diga sue i, “Rabai, laxakapmek atnege ga lox i la luxatli ren ga main? Ateren koplā at nenen mi ne temen?” ³Iesu ga vorang i ridi xeretna, “Luxatli ren ga main kopmen toxot at laxapmek teren koplā at nenen mi ne temen. Luxatli ren i main kusu ri lox asuusu lololos at ne Moroa at lorooro ren. ⁴Levenaleng na ik lok kusu atak lok lugugu ap mo

lara ga riki ia ude. Ketla laaleng naba vot la ata noxo epovo xusu ata gugu. I lok ngan laxangking move i soosoo la ata lok leven gugu, ketla dola lamain na vot, ata noxo gugu bok ba. ⁵Nenia move a nemen nade at lavatbung menemen la nenia laxasep ti limixin at na lavatbung menemen axap.”

⁶Melemu at na levelinga ren, neni ga xalaubis uto at laxangka; la ga gis nom loxongkangka, ni ga lox amulum i la ni ga lok li i ro at luxatli at nom laradi. ⁷La neni ga lok tin, “Unat pas la una gos lamaram to at lavatdan kis Siloam.” Lavasuun at na laasen do, ‘Gariki.’ La mo laradi ga vas kaxat, la ga gos lemeren la gamlong uto xolonu, luxatli ren monga ga repalas pam, ga reven ta.

⁸Nedi digak lox aurer i, la nedi bok limixin diga reven i ga ngising panga, avot be ri na lavanga sangsangu, la diga esue xeretna, “Kereva, neni vam na laradi no gat kis la ga ngising panga?” ⁹Leventaba diga lok, “Neni vam.”

Ketla leventaba vetpes diga lok, “Kopmen, ketla neni i ven ngan i.”

Ketla mo laradi xa ga lok, “Nenia vam mo laradi.”

¹⁰La diga sue lolos i, “Luxatli ram i lox avukat kereva?”

¹¹La ni ga vorang i ridi xeretna, “Lara laradi, laasen teren ne Iesu i xalaubis amumulum loxongkangka, la ia gis i de at luxatli rak, la ia lok tia do anat pas uto Siloam la ana gos lamarak. La nia a vas kaxat la ise do nia a gos lamarak, ara ven bok ba.”

¹²La diga sue i, “Ua nga mo laradi?”

La ni ga lok, “Axoklen i.”

Lubung Parisi Diga Ven Mumu Na Laradi

¹³Melemu mo limixin diga lok ka na laradi, luxatli ren ga main uto at lubung Parisi. ¹⁴Mo laaleng ne Iesu ga xalaubis loxongkangka la ga lox avukat luxatli ren, ni laaleng kaala. ¹⁵Kuren la lubung Parisi diga sue mo laradi do luxatli ren ga lox avukat kereva. La ni ga lok tidi, “Mo laradi i lok li loxongkangka mumulum at luxatli rak, la a gos lamarak la monga a epovo xusu ana reven.”

¹⁶Leventaba lubung Parisi diga lok, “Laradi i lox i na, kopmen boro at ne Moroa mila i los polo Lenavolo.”

Ketla leventaba vetpes diga lok, “Neni xopmen laradi xapmek mila laradi kapmek ixo epovo xusu na lok tevempanga sangsangu ngan i na.” La lekarakat ga ravasu xantubu atdi.

¹⁷La lubung Parisi diga sue amu manga mo laradi, “U lok do neni i lox avukat luxatli ram. Kereva lodoxoma ram tin?”

La neni ga vorang i ridi xeretna, “Neni leeme vapaase alii.”

¹⁸La luvuttadi amgomgo di goxo nuunu do luxatli ren ga main la mo nga neni ga epovo do na reven; kuren la diga riki lara laradi xusu na lam

ka ne temen mi nenen. ¹⁹La diga sue du, “Lamdak atnumu na? La kereva, at laaleng nenen ga visix i, luxatli ren ga main? I lok kereva la neni i reven manga?”

²⁰Temen mi ne nenen duga vorang i ridi xeretna, “Maklen i do neni lamdak atnama, la maklen box i do maga visix i, luxatli ren ga main. ²¹Ketla monga maxoklen i do i lok kereva la i epovo xusu na reven; la maxoklen box i do nege ga lox avukat luxatli ren. Mina sue i, neni laradi silok ta la neni xa ba vorang levesusue atnimi.” ²²Temen mi nenen duga tong i na mila duga marat at luvuttadi amgomgo. Luvuttadi amgomgo diga tong li vam levelinga do tara na tong i do ne Iesu neni Lanarong, diba sep pepe i xusu neni noxo vubeles bok ba uto at loogu singising. ²³Na lavasuun teren la ne temen mi nenen mo laradi duga lok, “Neni laradi silok ta; mina sue i.”

²⁴Diga ro ka amu manga mo laradi, luxatli ren ga main la diga lok tin, “Una xaape de melango at ne Moroa do nenu una vaase ruturun. Maklen i do na laradi ga lox avukar u, ni laradi xapmek.”

²⁵Mo laradi ga vorang i ridi xeretna, “Axoklen i do neni laradi xapmek kopla kopmen. Ketla leges avanga mene aklen i xeretna, luxatli rak ga main, ketla monga a reven avukat.”

²⁶Diga sue i, “I lok lavanga salai ru? La i lok arepalas luxatli ram kereva?”

²⁷La mo laradi ga lok tidi, “Ara tong pam i rinimi, la nemi mixo ronga i. Tila mik lok do mina ronga amu manga i? Agut nemi bok, mi vara i do, mina lok ngan luvuttadi loklok ka anasa ren.”

²⁸Diga vaase kapmek tin la diga lok tin keretna, “Nenu laradi loklok ka anasa ren, nema luvuttadi loklok ka anasa at ne Moses. ²⁹Maklen i do ne Moroa ga paase ri ne Moses; ketla ti nom laradi maxoklen tinotno i do neni ga laa meva.”

³⁰Mo laradi ga vorang i ridi xeretna, “Lavanga vetpes na. Mo laradi i lox avukat luxatli rak la mixoklen i do neni i laa meva. ³¹Ataklen i do ne Moroa kopmen nang tonga nedi limixin kapmek; ketla ing tonga mun nedi luvuttadi di lotu saparav i la nedi luvuttadi di mu asu lavavara ren. ³²Ga ru ka i at lurutu kaxat at na lavatbung menemen, goxovisi tara ga lox arepalas tuxatli at taradi, nenen ga visik axa i, la luxatli ren ga main. ³³Do mo laradi, xopmen ne Moroa nak lox eburu min, neni gita xo epovo na lox arepalas luxatli rak ngan tai na.”

³⁴La diga lok tin keretna, “Nenu u umsu mi laxapmek ga ru ka i at nenam ga visix u, la kereva ba uk lok tong i do una lox ase nama?” Kuren la diga sep pepe i xusu neni noxo vubeles bok ba uto at loogu singising.

Luxatli At Lebelen Laradi I Main

³⁵Iesu ga ronga i do diga sep pepe mo laradi. La ni ga vosiga i la ga sue i, “Kereva, u nuunu at Laradi Mevana?”

³⁶Mo laradi ga lok, “Leeme silok, una tong i ria do neni nege, kusu anaba nuunu ren.”

³⁷Iesu ga lok tin, “Ura ven pam i, la neni mo nga i epaase eburu minu.”

³⁸Mo laradi ga lok, “Leeme Silok, a nuunu ram.” La ni ga xis tiktikbu mi luvatgulom teren to melamgo at ne Iesu la ga lotu saparav i.

³⁹Iesu ga lok tin, “Aga vot nade at lavatbung menemen kusu ri ila mu loklok at limixin, la nedi lengkatli main diba reven avukat, la nedi di reven, levengkatli atdi ba main.”

⁴⁰Leventaba lubung Parisi digak lok go eburu min, diga ronga na levelinga, la diga sue i, “U doxoma i do nema bok lengkatli atnama i main?”

⁴¹Iesu ga vorang i ridi xeretna, “Dola lengkatli atnimi i main, i lox asuusu i do kopmen taxakapmek nak lok atnimi. Ketla mi tong i do, ‘Ma epovo ri reven;’ la lavasuun at nom levelinga do nemi move mi bixurun mi laxakapmek.”

Lavapaase Poovo Ri Loroboro At Laxasipsip

10 ¹La ne Iesu ga lok bok tidi, “A tong tuturun i rinimi; laradi do ixok beles at lumusmarakom at loroboro at laxasipsip, ketla i xot lixa at lengkot petpes, neni laradi xipkip pilo la laradi saksak paxat panga. ²Laradi do i xot lixa akmokso ro at lumusmarakom, neni laradi loklok tatao at laxasipsip. ³Laradi loklok tatao at lumusmarakom i susuang lumusmarakom tin; la laxasipsip diang tonga xisip laxaka ren do neni i toro ri levesipsip axa ren mi levenasen atdi, la i ram lam asu di ukamang. ⁴Do ira lam asu axap di ukamang, neni im gomgo nga di, la laxasipsip dia mumu asu i, mila laxasipsip ding tonga xisip laxaka ren. ⁵Di noxo mu asu gamasa tara vetpes; kopmen, diba epeseves basinge i, mila dixo ronga xisip laxaka ren.” ⁶Iesu ga tong na lavapaase poovo ridi, ketla di goxo xasep at na levelinga ren.

Iesu Neni Laradi Nunuan Ti Loklok Tatao Sipsip

⁷Kuren la ne Iesu ga lok manga, “A tong tuturun i rinimi. Nenia lumusmarakom ti laxasipsip. ⁸Nedi luvuttadi vetpes digamgo ria, nedi luvuttadi saksak paxat panga la luvuttadi xipkip pilo, ketla laxasipsip digoxo ronga res atdi. ⁹Nenia lumusmarakom. Do tara na beles keneng at na lumusmarakom, neni naba ruuna ka lorooro avolo; neni nabat pas beles la nat pas su la na puse xaka lempivilis nunuan. ¹⁰Laradi xipkip pilo ik beles mene rip kip pilo, tip sep amet, la rik lok kapmek laxasipsip. Nenia agara vot pam kusu ti raba lorooro ri limixin, la mo lorooro rak naba umsu atdi.

¹¹Nenia laradi nunuan ti lok tatao laxasipsip la a gagas bok kusu ana met ti laxasipsip. ¹²Laradi do di un kaka mene i xusu ri lok tatao

laxasipsip, la laxasipsip kopmen ateren, neni ik sixiro do neni i ven tangarang ka lavatman sio it pas kusu ri sev amet laxasipsip. Do kuren laman naba atat alis ka tentaba at nai laxasipsip la laxasipsip diba rem epeseves. ¹³Mo laradi ba sixiro mila neni laradi diga un kaka mene i la neni ixo doxoma solo laxasipsip.

¹⁴Nenia laradi nunuan ti lok tatao laxasipsip, la nenia akleklen mo laxasipsip do atarak, la nedi dikleklen ia, ¹⁵kerekngan mun ne Tamak ikleklen ia, la nenia akleklen ne Tamak. La a gagas kusu ri met nop di. ¹⁶Leventaba laxasipsip bok mo rak la dixok lok keneng at na loroboro. Aba lok ka bok di ukeneng. La nedi bok diba ronga laxaka rak la diba ngan legesi binam sipsip mene eburu minedi leventaba laxasipsip no dira nemen pam keneng at loroboro la legesa radi loklok tatao sipsip ba lok tatao di. ¹⁷Tamak i balamu ia mila a momo xusu ri raba lorooro rak, la anaba lok ka amlong box i. ¹⁸Kopmen teta naba lok pes lorooro rak basinge ia. Aba raba gamasa mun i at lavavara axa rak. La a epovo xusu ri raba lorooro rak la a epovo bok kusu ri roo xat amlong. Ne Tamak ga raba ia mi lololos ti lox i xuren.”

¹⁹Na levelinga at ne Iesu ga lox epeseves manga nedi leme Judaia ri legepu binam tadi mi levendoxoma vetpes. ²⁰Buaang atnedi diga lok, “Lagas i nemen teren. Neni ing tangku. Tila ming tonga i?”

²¹Ketla leventaba diga lok, “Laradi do lagas i nemen teren, kopmen na epovo ri paase xerepmo. Lagas kopmen na epovo naba lox arepalas lengkatli main.”

Luvuttadi Amgomgo Di Goxo Nuunu At Ne Iesu

²²Laaleng ga vot nga xusu ri limixin me Judaia ri lok leluxa ro Jerusalem ti lok katling laaleng diga lox anarong loogu laplavang to Jerusalem. Ga ravasu ap mo leven gaaling at lamdut. ²³La ne Iesu gat pas to xeneng at loogu laplavang at lara loxot, laasen teren do ‘Loxot at ne Solomon.’ ²⁴La luvuttadi amgomgo at limixin me Judaia diga vot pasa i la diga lok, “Lavanisa aleng ta unak lok nama la mana i doxoma? Tong axasep avukat nema do kereva nenu Lanarong?”

²⁵Iesu ga vorang i ridi xeretna, “Aga tong pam i rinimi, ketla kopmen mina nuunu rak. Levempanga sangsangu ak lox i mi lololos at ne Tamak di lox asuusu ia. ²⁶Ketla kopmen mina nuunu rak mila nemi xopmen laxasipsip tarak. ²⁷Laxasipsip tarak ding tonga laxaka rak. Akleklen di, la di mumu asu levelinga rak. ²⁸A raba nedi mi lorooro avolo la di noxo seeve rinotno; la tara noxo lok kepe di basinge ia. ²⁹Ne Tamak ga raba ia mi nom laxasipsip la neni i silok ti levempanga vipis axap, la tara noxo lok kepe nedi laxasipsip basinge loklok tatao ren. ³⁰Nema’ mi ne Tamak ma lok ngan legesara.”

³¹La diga ranga ka manga laxanuut kusu dina lu i. ³²Iesu ga lok tidi, “Agara lok pam laxampanga sangsangu ne Tamak ga raba ia min kusu

ana lox i ro melamgo atnimi; ti ua lara at nai nemi mi lok do mina lu var ia xusu nen?”

³³Diga vorang i rin keretna, “Maxo lok do mana luvar u mumu mo levempanga sangsangu, ketla u tong i do nenu ne Moroa. Nenu mun laradi, ketla uk lok tong pen i do una lox axa u xerekngan ne Moroa la u paase vupu rin.”

³⁴Iesu ga lok tidi xeretna, “Levelinga xeneng at Lenavolo atnimi i lok keretna,

‘Nenia aga tong i do nemi xa levenmoroa.’ *Sam 82:6*

³⁵Ataklen i do levelinga at Lenavolo i ruturun tinotno; la ne Moroa ga tong di do levenmoroa, ti mo luvuttadi levelinga ren ga vot tidi. ³⁶La ne Tamak ga soxolik ka ia la ga riki ia ude at na lavatbung menemen. Tila ba la, mia tong i do nenia a paase vupu ri ne Moroa mila a tong i do nenia Nitna ne Moroa? ³⁷Dola nenia xopmen ana lok leven gugu at ne Tamak, nemen mita nuunu bok ba rak. ³⁸Ket do anak lok leven gugu ren, la mixo nuunu rak, mina nuunu at leven gugu rak, kusu miba doxoma i, la minaklen i do ne Tamak i nemen keneng tarak, la nenia xeneng teren.” ³⁹Diga lok do dina ranga alis i, ketla neni ga vas su mulus mene at lengkikngan di.

⁴⁰Iesu ga vas korop amu manga ladan sen Joridan uto at lenep ne Jon gap sep susu limixin e gano, la neni gak lok go. ⁴¹Buaang nedi limixin diga vot pasa i, la diga lok, “Jon goxo lok tevempanga sangsangu xeretna, ketla levelinga axap, ne Jon ga paase mumu na laradi min ga ruturun.”

⁴²La buaang limixin go diga nuunu at ne Iesu.

Lanmet At Ne Lasaro

11 ¹Lara laradi laasen teren ne Lasaro, ga nemen to Beteni, ga meres. Beteni ni lemenemen ua ne Maria mi ne Mata nedu lueton duga nemen go. ²La ne Maria neni lara no ga sobili laxadan mavak to at luxangkedek at Leeme Silok la ga ves amesemes i mi lavatkabinim at lavatlak teren. Ne Lasaro neni neinen du, mo gak meres. ³La na lueton duga lox aonon levelinga ri ne Iesu keretna, “Leeme Silok. Lentangas orong taram i meres.”

⁴Se ne Iesu ga rongga i na, neni ga lok, “Lanmet kopmen neni laxavaxap at nai ri ne Lasaro; na lavanga i vot kusu ri emi asu mi ne Moroa, la kusu Nitna ne Moroa naba ruuna ka leemi asu.” ⁵Iesu ga balamu aleng ne Mata du lueton, la ne Lasaro. ⁶Se ne Iesu ga lok ka levelinga do Lasaro ga meres, neni ga nemen avolo bok go ap mo lenep, neni gak lox e at legepu aleng bok.

⁷Melemu neni ga lok ti luvuttadi loklok ka anasa ren, “Atamlong uto Judaia.”

⁸Ketla diga lok tin, “Rabai. Ga merena luvuttadi amgomgo diga lok do dina lu var u, tila u lok do unamlong?”

⁹Iesu ga vorang i ridi, “Laaleng kangking i ruuna lasangaun mi legepu xon atat aleng. Kuren la, mo do taradi nat pas at laxangking tubu, neni xopmen nak sak kikixin, mila neni i ven laxasep at na lavatbung menemen. ¹⁰Ket do taradi nat pas at laxanimin, neni nak sak kikixin, mila kopmen taxasep na nemen keneng teren.”

¹¹Iesu ga tong i na, la melemu ni ga lok bok, “Lentangas atdik ne Lasaro mo i unga, ketla abat pas la ana lox aus i.”

¹²La luvuttadi loklok ka anasa ren diga lok tin keretna, “Leeme Silok. Mo do neni go i unga, neni naba lox avukat.” ¹³Ketla lavasuun at levelinga at ne Iesu do Lasaro ga met; la luvuttadi loklok ka anasa diga nua i do Lasaro ga unga mene.

¹⁴Kuren la ne Iesu ga tong axasev i ridi do, “Lasaro mo ira met pam. ¹⁵Ketla a momo do nia goxok lox eburu min. La mumu mun i na, miba nuunu ba rak. Atat pas uto xusu tana vosiga i.”

¹⁶Tomas lara laasen bok teren ne Didimas ga lok ti mo luvuttadi loklok ka anasa xeretna, “Ata emu eburu min, kusu ataba met eburu min.”

Iesu Neni Laxakatu Kaxat Amlong La Lorooro

¹⁷Iesu ga vot, la neni ga long lenget ka i do limixin diga li vam ne Lasaro ro at lamaaut la lavanuet aleng gara volo vam i. ¹⁸Beteni goxo vaxalom boro Jerusalem, ¹⁹la buaang luvuttadi amgomgo at limixin me Judaia diga vot kusu dina ven ti ne Mata mi ne Maria xusu ri vaase amenemen du mumu lanmet at neinen du. ²⁰Se ne Mata ga ronga i do ne Iesu mo ga vot, neni ga vas su xusu ri ekip tangarang min; ketla ne Maria ga men alu go xolonu.

²¹Mata ga lok ti ne Iesu, “Leeme Silok. Mo do nu gitak lok de, neinuk gi toxo met. ²²Ketla akleklen i do monga ne Moroa naba raba u mi lavanga salai do una sing i min.”

²³Iesu ga lok tin, “Neinum naba rooro xat amlong.”

²⁴La ne Mata ga lok, “Aklen i do neni naba rooro xat amlong at laaleng kavaxap.”

²⁵Iesu ga lok tin, “Nenia laxakatu kaxat amlong mi lorooro. Do tara i nuunu rak, neni naba rooro amlong do neni na met. ²⁶La do tara i rooro la i nuunu rak, neni noxo met. Kereva, u nuunu at na levelinga?”

²⁷La ne Mata ga lok, “I ruturun, Leeme Silok. A nuunu do nenu Lanarong, Nitna ne Moroa, la ne Moroa ga lok do nenu unaba si ude xopok at lavatbung menemen.”

Iesu Gang Teng

²⁸Melemu at na levelinga at ne Mata, neni gamlong la ga vaase nemnem ti ne Maria, la ni ga lok, “Leeme loklox ase nga mo i auret la i susue ru do una vot pasa i.” ²⁹Se ne Maria ga ronga i na, neni ga xatu

kaxat la ga vas soso mun kusu ri vas tangarang ka i. ³⁰Iesu goxovisi vot to xolonu, ketla neni move ga nemen ap mo lenep ne Mata ga xip tangarang ka i ve. ³¹Luvuttadi amgomgo mo digak lok go at loogu eburu mi ne Maria diga paase amenemen i. Se diga ven i ga xatu kaxat la ga vas su soso ukamang, diga mumu asu i. Diga nua i do neni mo gat pas uto at lamaaut, kusu nang teng go.

³²Se ne Maria ga vot to at lenep ne Iesu ga nemen e la ga ven i, neni ga xis tiktikbu mi luvatgulom teren la ga lok, “Leeme Silok, mo do nu gitak lok nade, neinuk gi toxo met.”

³³Iesu ga ven i gang teng, la luvuttadi amgomgo bok mo diga emu min digang teng, la lebelen ga lok tuntun aleng. ³⁴La ni ga sue di xeretna, “Miga li i ua?”

La diga lok, “Atat pas la una ven i.”

³⁵La ne Iesu gang teng.

³⁶La luvuttadi amgomgo diga lok, “Mi ven ba i, neni i balamu aleng ne Lasaro.”

³⁷Ketla leventaba atdi diga lok, “Neni ga lox arepalas luxatli at laradi luxatli ren ga main. La kereva, ni goxo epovo do na lox aroo ne Lasaro xusu ni noxo met?”

Iesu Ga Lox Axatu Amlong Ne Lasaro Basinge Lanmet

³⁸Lebelen ne Iesu ga lok tuntun amu bok, la neni gat pas uto at lamaaut; mo lamaaut gak lok to at lubuang la lavaruat gak lok pe lungusungus ap mo lubuang. ³⁹La ne Iesu ga lok tinedi xeretna, “Mina lok pes lavaruat basinge lubuang.”

La ne Mata, neinen ne Lasaro ga lok, “Leeme Silok, lorongan naba somao mila at lavanuet aleng ta, neni gak midi ro xeneng at lamaaut.”

⁴⁰Iesu ga lok tin, “Kereva, nenia agoxo tong box i ru do uba ven lololos at ne Moroa mo do una nuunu?”

⁴¹Diga lok pes lavaruat, la ne Iesu ga milik urut upana la ga lok, “A tong aorong tu Tamak, do u ronga ia. ⁴²Aklen i do amisik ung tonga ia, ketla a tong i na xusu na limixin diba nuunu do uga riki ia.”

⁴³Melemu at na levelinga ren, neni ga xup lolos keretna, “Lasaro. Pas su.” ⁴⁴La ne Lasaro ga vas su nga, la lukngen mi luxangkedek teren diga is i mi lentamon itis tongan; la labantamon bok diga is pe lavatlak teren min.

La ne Iesu ga lok, “Mina soxomus asu i, la mina soxepe i uto na onon.”

Luvuttadi Amgomgo Diga Lok Langas Linga Ri Sep Ne Iesu

(Mt 26:1-5; Mk 14:1-2; Lu 22:1-2)

⁴⁵Buaang atnedi luvuttadi amgomgo mo diga vot kusu ri ven ne Maria, kuren la diga ven na lavanga ne Iesu ga lox i la diga nuunu ren. ⁴⁶Ketla

leventaba atdi digamlong uto at lubung Parisi la diga tong i ridi mumu mo lavanga sangsangu ne Iesu ga lox i. ⁴⁷Kuren la lubung Parisi la lavamaasa silok diga vot buru la diga lok, “Ataba lok lavanga salai? Mina doma mumu levempanga sangsangu na laradi ik lox i. ⁴⁸Mo do ata ke xepe i nak lok na levempanga, limixin axap diba nuunu ren, la limixin boro Rom diba musak dik la dina lok kapmek loogu laplavang la limixin atdik.”

⁴⁹Lara atdi laasen teren ne Kaiapas, neni lamaasa gomgo ap mo lamaares ga lok, “Mixoklen tevempanga. ⁵⁰Mina xasep do i lox avukat ti tegesa radi na met nop limixin la kusu limixin boro Rom noxo sev amet axap limixin atdik.”

⁵¹Ni goxo tong i na mi lodoxoma axa ren, ketla neni ga lamaasa gomgo ap mo lamaares, la neni ga paase alii do Iesu mo naba met nop limixin me Judaia, ⁵²la kopmen tinedi xusuk, ketla tinedi bok limixin kopmen di me Judaia no diga epeseves la neni naba lox asi buru du ngan legesa bungmixin.

⁵³Ga ru ka i ap mo laaleng luvuttadi amgomgo me Judaia diga puse ngas do ri sev amet ne Iesu.

⁵⁴Kuren la ne Iesu goxot pas saxaven go Judaia. Ketla neni ga on basinge mo lenep la gat pas uto at loxot gak lok saparap lamatbin, uto at lemenemen laasen teren Epraem la gak lox eburu mi luvuttadi loklok ka anasa ren go. ⁵⁵Leluxa at leme Judaia laasen teren Lovovolo Pe mo ga auret ta, la buaang limixin at lengkot axap at levennep Judaia digat pas uto Jerusalem, kusu ri lox adadat nedi at lemeren ne Moroa ri mo leluxa. ⁵⁶Diga reven ti ne Iesu, la se diga vot go at loogu laplavang diga esue xa minedi getgesara, “Kereva, mi doxoma i do neni naba vot bok ti na leluxa?” ⁵⁷Lubung Parisi mi lavamaasa silok diga raba linga vam di. Do tara na ven lenget ne Iesu go at toxot, neni naba tong i ridi xusu diba ranga alis i.

Maria Ga Gos Luxangkedek At Ne Iesu Ro Beteni

(Mt 26:6-13; Mk 14:3-9)

12 ¹At lavanna aleng avot ti leluxa at Lovovolo Pe, Iesu gat pas uto Beteni, mo lemenemen ne Lasaro gak lox e; ni laradi ne Iesu ga lox arooro amlong i basinge lanmet. ²Limixin at ne Lasaro diga lox agagas li leveluxa rin go, la ne Mata ga raba luxa di, la ne Lasaro la leventaba luvuttadi bok diga anan eburu mi ne Iesu. ³La ne Maria ga lok ka lubuxom^c ga umsu mi laxadan mavak, laasen teren naat. Mo laxadan somavak luunun teren ga silok aleng. La neni ga soli i ro at luxangkedek at ne Iesu, la ga ves amesemes i mi lavatkabinim at lavatlak teren. Losomavak at na laxadan ga umsu go xeneng ap mo loogu.

^c 12:3 Na lubuxom tuntu diga lox i mi luat bunbun.

⁴La lara laradi loklok ka anasa at ne Iesu, ne Judas Iskariot, neni mo lara ga song araba ne Iesu ri limixin kapmek, ga lok keretna, ⁵“Kereva, ixo epovo dina sesep mi na laxadan mavak la naba epovo at lavantun sangaun kobot (300) denarias kusu dina raba limixin banbalo min?” ⁶Ni ga tong i na, mila neni laradi xipkip pilo la kopmen do ni ga doxoma limixin banbalo, ketla neni ga vara i do neni ba xip pilo xaka i. Neni gak lok tatao lempilas atdi la amisik ni gam nem teren.

⁷Ketla ne Iesu ga lok, “Keke mulus na latkin. Na ladan neni gam tebeng i xusu rik mir ia. ⁸Limixin banbalo dibat pot pasa amisik nimi xusu mibak lok tooro di, ketla nenia noxo nemen eburu amisik minimi.”

Lavamaasa Diga Puse Ngas Ti Sev Amet Ne Lasaro

⁹Buaang limixin me Judaia diga rongga i do ne Iesu gak lok to Beteni, kuren la digat pas ugo; digat pas mila diga vara i do dina ven ne Iesu mi ne Lasaro, mo ne Iesu ga lox arooro amlong i basinge lanmet. ¹⁰Kuren la lavamaasa silok diga tong li levelinga do diba sev amet bok ne Lasaro, ¹¹mila buaang nedi limixin me Judaia diga sok tixirixes lavamaasa la diga nuunu nga at ne Iesu.

Iesu Ga Beles To Jerusalem

(Mt 21:1-11; Mk 11:1-11; Lu 19:28-40)

¹²Ap mo laaleng petpes buaang nedi limixin mo diga vot ti leluxa at Lovovolo Pe la diga rongga i do ne Iesu mo gat pas uto Jerusalem. ¹³Kuren la diga ra ka laxangkakan bisi la diga vas su xusu ri ekip tangarang min. La diga lok,

“Ata emi asu mi ne Moroa. Luvukat ti mo laradi it pas mi laasen at Leeme Silok. Luvukat ti Loorong Silok boro Israel.” *Sam 118:25-26*

¹⁴Iesu ga lok ka lodongki maxat la ga xis teren, kerekngan Lovoang Kaala ga tong i xeretna,

¹⁵“Limixin me Saion. Nemen mita marat. Loorong Silok atnimi nom it pas saparap nimi, it kis at lodongki maxat.” *Sak 9:9*

¹⁶Ap mo laaleng na lavanga ga ravasu, luvuttadi loklok ka anasa di goxo xasep at lavasuun ap mo levelinga; ketla se at laaleng ne Iesu ga rooro xat amlong digaklen ba i do Lovoang Kaala ga tong asu na lavanga, la mo limixin diga lox i na ri ne Iesu.

¹⁷La mo limixin diga nemen eburu mi ne Iesu ap mo laaleng neni ga roo asu ka ne Lasaro boro at lamaaut, la ga lox aroo amlong i basinge lanmet. Diga tong asu na lavanga ro Jerusalem. ¹⁸La buaang nedi limixin digat pas kusu ri ekip tangarang min, mila diga rongga i do neni ga lox aroo amlong ne Lasaro. ¹⁹Kuren la lubung Parisi diga lok tinedi getgesara, “Mina ven ba i. Ata noxo lox asoxos toxot at levendoxoma atdik. Limixin axap mo dia mumu asu nga ne Iesu.”

Limixin Petpes Diga Lok Do Dina Epaase Eburu Mi Ne Iesu

²⁰Ap mo laaleng at leluxa, leventaba limixin me Grik diga nemen kantubu ap mo limixin mo digat pas uto Jerusalem kusu ri lotu. ²¹Diga vosiga ne Pilip, neni boro Betsaida at lenep Galili la diga lok tin, “Leeme Silok. Ma vara i do mana vot pasa ne Iesu.” ²²Pilip gat pas la ga tong i ri ne Endru, la nedu buru dugat pas la duga tong i ri ne Iesu.

²³La ne Iesu ga lok tidu xeretna, “Loxonaleng mo ia epovo vam kusu ne Moroa na lox asilox ia, Laradi Mevana. ²⁴A tong tuturun i rinumu. Luxuvenit piao, do limixin di noxotlo i, noxo visik. Do i mang la ditlo li i at laxangka, melemu ba visik buaang levempeven piao. ²⁵Do tara i balamu aleng lorooro ren, neni naba sang apkav i. La do tara ixo balamu aleng lorooro ren at na lavatbung menemen kopok, neni nabam tebeng amisix i ri lorooro avolo. ²⁶Do tara i vara i do na lok lugugu rak, neni na lok kaka be loklok tarak, kusu neni ba lok ngan lasaxaruki rak la ba nemen ap mo lenep nenia anak lox e. Ne Tamak naba lox asilox i do neni na lok lugugu rak.”

Iesu Ga Paase Mumu Lanmet Teren

²⁷La ne Iesu ga lok bok tidi, “Mo nga labalak ixo xis saga la aba tong ka lavanga salai? Agut aba lok do, ‘Tamak, i epovo do una lok kepe na lumumuat basinge ia?’ Kopmen. Nia aga si ude xusu ri beles at na loxonaleng at losongsongot.” ²⁸La ne Iesu ga sing ne Temen keretna, “Tamak. Una lox asuusu i nom lisisixam taram ti limixin kusu diba ven kibis i do nenu ne Moroa u silok aleng.”

Melemu laxaka at lara ga si boro vana at laxalibet, ga lok, “Ara lox ase vam di mi lisisixam tarak la aba lox amu box i.” ²⁹La limixin diga tu go diga ronga na levelinga la diga lok, “I mumuat ngan leretepaavat.” La leventaba diga lok, “Laangelo i paase rin.”

³⁰La ne Iesu ga lok tidi, “Na levelinga mi ronga vam i, kopmen ti lok tooro ia, ketla ti lok tooro nimi. ³¹Mo nga loxonaleng kusu ne Moroa na ila mumu loklok at limixin at lavatbung menemen; la ne Moroa naba lox axap lololos at ne Satan, neni lamgomgo at na lavatbung menemen. ³²Do dina vaxarem ia uto vana at laxaba la nia ana urut upana basinge na lavatbung menemen, nenia aba sat tomtom ka limixin axap saparav ia.” ³³Ni ga vaase i na mumu lanmet neni naba ekip tangarang min.

³⁴La limixin diga lok, “Lenavolo atnama i tong i do Lanarong na rooro amisik. Kereva u tong i do Laradi Mevana diba vaxarem i upana? La nege mo Laradi Mevana?”

³⁵Iesu ga vorang i ridi xeretna, “Laxasep at ne Moroa noxo nemen abao eburu minimi. At lavatpas atnimi at na lavatbung menemen, mina nemen at laxasep mila laxasep move i nemen eburu minimi, kusu laxakapmek

noxo los kis pavaa nimi ngan lamain; mila lara do it pas at lamain ixokleklen i do neni it pas ua. ³⁶Laxasep at ne Moroa move i nemen eburu minimi; kuren la mina nuunu ren, kusu nemi miba nemen ngan limixin at laxasep.” Melemu at na levelinga ne Iesu ga tong i, neni ga vas kaxat la ga lox alipe i basinge di.

Buaang Atdi Limixin Me Judaia Di Goxo Nuunu At Ne Iesu

³⁷Iesu ga lok buaang levempanga sangsangu ro melamgo at leme Judaia, ketla move di goxo nuunu ren. ³⁸La kerepmo diga lox aruturun levelinga at leeme vapaase alii ne Aisaia, ni ga lok,

“Leeme Silok, nege ga nuunu at levelinga maga tong i? Kopmen tara. Leeme Silok ga lox asuusu lololos teren ti nege? La kopmen tara goxo ven kibis i.” *Ais 53:1*

³⁹Na mun i lavasuun teren la di goxo epovo do dina nuunu. Ne Moroa ga paase alii at lungusno ne Aisaia, neni ga lok,

⁴⁰“Moroa ira lox amain pam lengkatli atdi, la ira vipe vam levendoxoma atdi xusu lengkatli atdi noxo reven la levendoxoma atdi noxokleklen. La di noxo vosiga ia xusu nenia aba lox arooro di.” *Ais 6:10*

⁴¹Aisaia ga tong i na mila neni ga ven lisisixam silok at ne Iesu la ni ga paase alii min.

⁴²La buaang luvuttadi amgomgo bok diga nuunu at ne Iesu, ketla diga e amarat at lubung Parisi. Kuren la di goxo paase asu lunuunu atdi ri tentaba vetpes, mila lavanga lubung Parisi dina sep pepe di xusu di noxo pubeles bok ba at loogu singising. ⁴³Diga vavara aleng i xusu limixin dina emi asu midi; la di goxo doma solo mumu leemi asu boro at ne Moroa.

Levelinga At Ne Iesu Naba Vaxaru Limixin At Lavapaase

⁴⁴Iesu ga vaase silok ti limixin keretna, “Do tara na nuunu rak, i nuunu bok ap mo lara ga riki ia ude. ⁴⁵Do neni i ven ia, i ngan do i ven mo lara ga riki ia ude. ⁴⁶Nia aga rupot ti na lavatbung menemen ngan laxasep kusu tara na nuunu rak, neni noxo nemen at lamain.

⁴⁷Do tara na ronga levelinga rak la kopmen na ronga res teren, nenia noxo lok li i at lavapaase, mila aga vot ti lox arooro limixin, la kopmen do ti lok li di at lavapaase. ⁴⁸La do tara i raba aralu ia la kopmen na sisiam ka levelinga rak, neni ira sok ka vam lenep tin, mila levelinga mun tarak naba lok li mo lara at lavapaase at laaleng ete. ⁴⁹Anai i ruturun aleng, mila kopmen nenia xusuk mo a paase mi lololos axa rak, ketla ne Tamak neni ga riki ia, ni ga tong lolos mo levelinga ria do nia aba tong i, la langas salai nia aba mu i ri vaase axasev i. ⁵⁰La aklen i do levelinga lolos teren naba lok li limixin at lorooro avolo. Levelinga axap tarak, ni levelinga ne Tamak ga tong i ria xusu ana paase i asu.”

Iesu Ga Gos Lengkangkedek At Luvuttadi Loklok Ka Anasa Ren

13 ¹At laaleng avot ti leluxa at Lovovolo Pe, Iesu gaklen pam i do loxonaleng ga epovo vam kusu rin ti on basinge na lavatbung menemen la nat pas uto saparap ne Temen. Amisik ne Iesu ga balamu limixin axa ren. La ni ga lox asuusu labalamu ren tidi at laaleng neni ga met teren.

²Iesu eburu mi luvuttadi loklok ka anasa ren digat kis eburu at laanan ga ukantinao. La ne Satan ga li vam lodoxoma ro xeneng at ne Judas Iskariot, lamdak at ne Simon do neni naba song araba ne Iesu ri limixin kapmek. ³Iesu gaklen pam i do ne Temen ga lok li levempanga axap maxopok at loklok tatao ren, la gaklen box i do neni ga si boro vana at ne Moroa la nabamlong bok tin. ⁴Kuren la ne Iesu ga xatu kaxat, la ga soxomus pes lavanga singsiga ren boro maxamang, la ga dos korov i mi lavattamon. ⁵Melemu neni ga lok ka laxadan la ga soli aruv i ro xeneng at lavatbaaket, la ga ru ka i xusu na gos lengkangkedek at luvuttadi loklok ka anasa ren; la melemu ga ves amesemes lengkangkedek atdi mi lavattamon no neni ga dos korov i min.

⁶Iesu ga vas saparap ne Simon Pita, la ne Simon Pita ga sue ne Iesu xeretna, “Leeme Silok. Kereva, una gos bok luxangkedek tarak?”

⁷Iesu ga vorang i rin keretna, “Uxoklen lai, mo nga nia ak lox i. Ketla melemu ba, uba xasep teren.”

⁸Ketla ne Pita ga lok, “A noxo ke xepe u xusu una gos luxangkedek tarak at toxonaleng.”

La ne Iesu ga lok tin keretna, “Dola nia a noxo gos luxangkedek taram, kopmen toxot taram kantubu at limixin tarak.”

⁹Simon Pita ga lok, “Leeme Silok, nemen uta gos kusuk mun luxangkedek tarak. Una gos bok lukngak mi lavatlak tarak.”

¹⁰Ketla ne Iesu ga lok, “Do nege ira susu vam, neni ira dadat pam; la ixo epovo xusu ni na susu amu bok; i epovo mun na gos luxangkedek teren. Nemi axap mira dadat pam, ketla legesara mun atnimi, kopmen.”

¹¹Iesu garaklen pam i do lara naba lok ka i la na song araba limixin kapmek min. Kuren la neni ga lok, “Nemi axap mi dadat; ketla legesara mun atnimi, kopmen.”

¹²Iesu ga gos axap lengkangkedek at luvuttadi loklok ka anasa ren, la melemu neni ga etara amlong manga lavanga singsiga ren. La ni gamlong ti loxot kitkis teren to at laxangkaaning. La ga sue di xeretna, “Kereva, mi xasep at lavanga salai mo vam nia a lox i rinimi? ¹³Mi tong ia do laradi loklox ase la Leeme Silok, la ik mokso xuren, mila nenia laradi loklox ase la Leeme Silok. ¹⁴La mo vam nia a gos lengkangkedek atnimi. Nemi bok, mina mu asu na loklok kantubu atnimi. ¹⁵Ara lok pam na loklok poovo xusu miba lox i xerekngan nia ara lok pam i rinimi. ¹⁶A tong tuturun

i rinimi, kopmen tasaxaruki na silok ti laradi gomgo ren, kopla laradi xikip linga na silok ti lara ga riki i. ¹⁷Do mina xasep at na levelinga, la mina lox epovo i, Moroa naba lox anarong nimi.”

Iesu Ga Vaase Alii Do Neni Naba Met

¹⁸La ne Iesu ga lok tidi, “Ketla kopmen nemi axap ta miba lok ka loklox anarong. Aklen nedi leventaba agara lok katling pam nedi ngan luvuttadi vavang tarak, ketla legesara mun atnimi, kopmen. Neni ik lok ti lox asorun levelinga xeneng at Lovoang Kaala i lok keretna,

‘Neni mo lara i an eburu minia at loxongkide, ira raba vam ia ri limixin kapmek.’

Sam 41:9

¹⁹A tong ta i mo rinimi avot ti mo lavanga naba rupot; la do na vot, miba nuunu ba do nenia Lanarong. ²⁰A tong tuturun i rinimi, do nege na siam ka tara nia ana riki i, neni i ngan i siam ka ia. La do tara na siam ka ia, i siam ka mo lara ga riki ia ude.”

²¹Iesu ga vaase axav i na la lebelen goxo xis saga avukat. La ga lok keretna, “A tong tuturun i rinimi, do lara mo xantubu atnimi naba song araba ia ri limixin kapmek.”

²²Luvuttadi loklok ka anasa ren diga epen etang, di goxoklen i do, Iesu ga paase mumu nege. ²³La lara atdi, no ne Iesu ga vavara aleng tino i, gat kis saparap tinotno ne Iesu. ²⁴Simon Pita ga lok loklok katling tin la ga lok, “Una sue i do, nege mo lara?”

²⁵Kuren la ni ga sep sogo at lobongobong at ne Iesu, la ga sue i, “Leeme Silok, nege mo?”

²⁶Iesu ga vorang i rin keretna, “Dola nia ana gos amlu xaka na loxongkide xeneng at laxadan sos, la ana raba mo laradi min, neni mo laradi.” Melemu neni ga lok ka loxongkide la ga gos amlu ka i, la ga raba ne Judas Iskariot min, lamdak at ne Simon. ²⁷Se ne Judas ga ranga ka loxongkide, Satan ga beles ukeneng teren.

La ne Iesu ga lok tin, “Mo lavanga u vara i do una lox i, una lok soso nga i.” ²⁸Ketla kopmen teta maxeneng at nom laanan ga xasep at lavasuun at levelinga ne Iesu ga tong i rin. ²⁹Judas neni gak lok tatao lempilas, la leventaba atdi diga nua i do Iesu ga paase ri ne Judas kusu na un ka tevempanga anan ti leluxa kopla na raba tevempanga ri limixin banbalo. ³⁰Melemu at ne Judas ga lok ka mo loxongkide, ni ga vas su nga ukamang. Lemenemen mo gara main ta.

Iesu Ga Vaase Alii Do Ne Pita Na Sok Tixirixes I

(Mt 26:31-35; Mk 14:27-31; Lu 22:31-34)

³¹Judas ga onon pam, la ne Iesu ga lok, “Monga lisisixam tarak, Laradi Mevana, naba ravasu asuvos, la maxeneng teren limixin diba ven axasep avukat lisisixam at ne Moroa keneng tarak, ne Nitna. ³²Do nenia ana lox

asuvos lisisixam at ne Moroa, Moroa ba lox asuvos lisisixam teren keneng tarak, ne Nitna la ba lok soso mene nga i.

³³Luvutnuruk. Aba nemen eburu minimi at loxonaleng kakalik mun. La melemu miba reven tia, kerekngan nia aga tong pam i ri leme Judaia; kuren la a tong box i mo rinimi, mo loxot nia anat pas tin, ixo epovo do minat pas uve.

³⁴Levelinga maxat na ana raba nimi min; mina ebalamu ela xeneng atnemi xerekngan nia aga balamu nimi. ³⁵Limixin axap dibaklen i do nemi luvuttadi loklok ka anasa rak, mo do mina ebalamu ela minimi xa.”

³⁶Simon Pita ga sue i, “Leeme Silok, ubat pas ua?”

Iesu ga vorang i rin, “Loxot nia anat pas uve, nenu u noxot pas tin monga, ketla melemu nenu uba mumu ba ia.”

³⁷Pita ga sue box i, “Ua lavasuun teren la monga nia axo epovo na mumu asu u? Nia aba met nov u.”

³⁸La ne Iesu ga vorang i rin, “Kereva, u epovo ri raba ruturun lorooro ram tia? A tong tuturun i ru, avot ti laxaxak naba reng ningina nubung la unaba sev apkap naba vantun do uxoklen ia.”

Iesu Ga Lox Amenemen Luvuttadi Loklok Ka Anasa Ren

14 ¹Iesu ga lok ti luvuttadi loklok ka anasa ren keretna, “Nemen gat lebelen nimi na bulu. Mina nuunu at ne Moroa, la mina nuunu bok tarak. ²Buaang lengkontaugu lixilik mo i nemen at loogu at ne Tamak. Mo dola kopmen, nia gita ba tong i rinimi. Anat pas ugo xusu ana lox agagas li lengkot tinimi. ³Dola anat pas ugo, ana lox agagas tengkot tinimi, la anabamlong bok la ana lam ka nimi ri mo lemenemen nenia ana nemen teren kusu nemi bok miba nemen eburu minia. ⁴Nemi miklen langas ti mo lemenemen nenia anat pas uve.”

Iesu, Neni Langas Ti Ne Temen

⁵Tomas ga lok ti ne Iesu, “Leeme Silok, maxoklen i do unat pas ua, kuren la mabaklen langas kereva?”

⁶Iesu ga vorang i rin, “Nenia langas, luruturun mi lorooro. Kopmen teta naba vosiga ne Tamak at tangas petpes, ketla atarak kusuk mun. ⁷Dola miklen avukar ia, mibaklen avukat bok ne Tamak. I ru ka i mo lingina, miklen ba i la mira ven ba i.”

⁸Pilip ga lok, “Leeme Silok, una lox ase nama mi ne Tamam la ni naba epovo atnama.”

⁹Iesu ga lok tin keretna, “Pilip, aga nemen amisik eburu minu la nu xovisi unaklen ia do? Do lara ira ven pam ia, neni ira ven pam ne Tamak. Ixo epovo do una tong i do, una lox ase nama mi ne Tamam. ¹⁰Kereva, uxo nuunu do nia a nemen at ne Tamak, la ne Tamak i nemen tarak? Levelinga a paase i rinimi kopmen atarak axa. Ketla at ne Tamak axa,

i nemen tarak neni gak lok mo leven gugu. ¹¹Mina nuunu at levelinga a tong i do, nenia a nemen at ne Tamak la neni i nemen tarak. Dola kopmen, mina nuunu rak mumu levempanga sangsangu nia agak lox i. ¹²A tong tuturun i rinimi do nege i nuunu rak, neni naba lok levempanga i ngan nia agak lox i. Neni naba lok levempanga i silok aleng ti mo levempanga nia agak lox i, mila nia anat pas uto vana at ne Tamak. ¹³La do mina sing ti tevempanga xeneng at laasen tarak, anaba lox epovo i, xusu nenia Nitna ne Moroa, anaba lox asilok laasen at ne Tamak. ¹⁴Minaba ngising ti levempanga nemi mi vara rin keneng at laasen tarak, la nia anaba lox i. ¹⁵Do mina balamu ia, minaba lok levempanga nia a tong i.”

Iesu Ga Vaase Alii Mi Lovotpot At Loroonan Kaala

¹⁶La ne Iesu ga lok bok, “Nia anaba sing ne Tamak, la neni naba raba bok nemi mi lara laradi loklok tooro, la neni naba nemen eburu amisik minimi. ¹⁷Neni Loroonan Kaala at luruturun. Limixin at na lavatbung menemen dixo epovo na siam ka i, mila kopmen dina ven kibis i xopla dinaklen i. Ketla nemi miklen i mila neni i nemen eburu minimi la neni naba nemen keneng atnemi. ¹⁸Dola ana onon, anoxo ke xepe nemi ngan lubangkarun, ketla anabamlong bok ude saparap nemi. ¹⁹Noxo lox abao la limixin at na lavatbung menemen dinoxo ven bok ba ia, ketla nemi miba ven ia. Nenia lavasuun at lorooro, kuren la nemi bok miba rooro. ²⁰Dola nom laaleng na vot, mibaklen ka i do nenia a nemen eburu mi ne Tamak la nemi mi nemen tarak; kerekngan mun nenia a nemen keneng atnemi. ²¹Do nege na siam ka levelinga rak la na ronga res teren, neni laradi i balamu aleng ia. La ne Tamak naba balamu nege tara do na balamu ia. La nenia bok anaba balamu i la ana lox asuvos ia rin.”

²²Judas (kopmen ne Judas Iskariot) ga sue i, “Leeme Silok, naba lok kereva la una lok nama xusu mana ven u, la kopmen limixin at na lavatbung menemen?”

²³Iesu ga vorang i rin keretna, “Do nege i balamu ia, neni naba ronga res at levenanasa rak. Ne Tamak naba balamu i, la nema’ mi ne Tamak, maba esuxun min la mana nemen eburu min. ²⁴Do nege xopmen na balamu ia, neni noxo ronga res at levenanasa rak. La mo levenanasa miga ronga vam i, kopmen atarak, ketla boro at ne Tamak ni ga riki ia.

²⁵Agara tong pam na levelinga rinimi at na levenaleng nenia a nemen eburu minimi. ²⁶Ketla laradi loklok tooro, ni Loroonan Kaala ne Tamak naba riki i xeneng at laasen tarak. Neni naba anasa nemi mi levempanga vipis axap la naba vaase aronga nemi ri levempanga agara tong pam i rinimi. ²⁷Lenmila rak na nemen maxeneng atnemi; limila rak ana raba nemi min. Axo raba i na i ngan limixin at na lavatbung menemen dim taba i xuren. Nemen mita bulu la mina marat.

²⁸Mia rongga vam levelinga rak keretna; ‘ana on basinge nimi, ketla anabamlong bok ude saparap nimi.’ Do mina balamu ia, miba momo aleng do nenia anat pas uto at ne Tamak; mila neni i silok aleng tia. ²⁹Agara tong avot pam na levempanga rinimi. Do na levempanga na vot, miba nuunu ba at na lempapaase rak. ³⁰Anoxo vaase babaalom eburu bok minimi mila laradi gomgo at na lavatbung menemen monga na vot. Kopmen tololos teren mavana rak. ³¹Ketla limixin at na lavatbung menemen dinabaklen ka i do a balamu aleng ne Tamak, la nia ak lok levempanga axap kerekngan neni ga tong i ria. Dik ta mo, ata vas kaxat basinge na lenep.”

Iesu Neni Luuna Vaen Tuturun

15 ¹Iesu ga lok bok ti luvuttadi loklok ka anasa ren, “Nenia luuna vaen tuturun, la ne Tamak neni laradi loklok tatao at laraamang. ²Neni i tara xepe mo lengkakan una rak, do kopmen dina pisik. La ip sep susudun mo lengkakan una do di pisik avukat, kusu dinaba pisik aleng. ³Mo levelinga aga vaase i rinimi gara lox adadat pam nimi. ⁴Mina nemen tarak, la nia anaba nemen atnimi. Laxakan una xopmen na epovo na visik do ni xopmen na nemen sogo at luuna. Nemi xopmen mina epovo ri visik lempeven una se do nemi mina nemen tarak.

⁵Nenia luuna vaen, la nemi mi ngan lengkakan una. Do nege i nemen tarak, la nenia a nemen teren, neni naba visik buaang tempeven una; kopmen mina epovo do mina visik tempeven una do nemi mixo nemen tarak. ⁶Do nege xopmen na nemen tarak, neni i lok ngan laxakan una dinaba ra korop pes i la dina lu asu min kusu na mang, la dina sigi bubua li i la dina xotos kepe i at laxao. ⁷Do mina nemen tarak, la do minam tebeng lolos levelinga rak, mina sing ti levempanga salai mi vara rin, la miba ruuna ka i. ⁸Do mina visik aleng, miba lox asuusu ba i do nemi luvuttadi loklok ka anasa rak, la miba lox asilok laasen at ne Tamak.

⁹A balamu nimi xerekngan mun ne Tamak i balamu ia; mina nemen keneng at labalamu rak. ¹⁰Do mina rongga res at levelinga rak, miba nemen keneng at labalamu rak, kerekngan mun nia agang tonga res at levelinga at ne Tamak la aga nemen keneng at labalamu ren. ¹¹A tong na levempanga rinimi xusu lomomo rak naba nemen keneng at lorooro atnimi, la nom lomomo atnimi naba silok. ¹²Lavapaase rak keretna, mina ebalamu ela minimi xerekngan nia a balamu nimi. ¹³Do tara na soxepe lorooro ren ti lok tooro larapen tangas teren, nom i lox asuusu i do labalamu ren i silok aleng. ¹⁴Do mina lok levempanga nia aga tong i rinimi, nemi larapen tangas tarak. ¹⁵Axo tong bok ba nimi do lavasaxaruki, mila lasaxaruki xopmen naklen levempanga, lamgomgo ren ik lox i. Ketla, a tong nimi do larapen tangas tarak, mila agara vaase vam nimi mi levempanga axap ne Tamak ga tong i ria. ¹⁶Nemi xopmen mi

goxo soxolik ka ia; nenia xa aga soxolik ka nimi xusu mina lok lugugu rak la mina visik asu tevempeven una nunuan, nom lempeven una nunuan kopmen noxop sopso, ketla naba nemen amisik. Kuren la ne Tamak naba raba nimi mi tevempanga salai mina sing tin keneng at laasen tarak. ¹⁷Lavapaase rak tinimi xeretna; mina ebalamu ela minimi xa.

Lebelemamao At Limixin At Na Lavatbung Menemen

¹⁸Do limixin at na lavatbung menemen dina belemamao nimi, minaklen i do nedi ga belemamao avor ia. ¹⁹Ketla nia aga soxolik ka nimi basinge na lavatbung menemen. Do nemi mede at na lavatbung menemen, limixin diba vara aleng nimi. Ketla kopmen nemi mede; kuren la limixin at na lavatbung menemen diba belemamao nimi. ²⁰Mina doxoma levelinga nia aga tong i rinimi i lok keretna, kopmen tasaxaruki na silok ti laradi gomgo ren. Do dina lox asongor ia, diba lox asongot bok nimi; do dina ronga res at levelinga rak, diba ronga res bok at levelinga atnimi. ²¹Diba lok na levempanga rinimi mila mi nuunu rak la dixoklen mo lara ga riki ia. ²²Do nia gita vot la gita vaase ridi, nedi xa gitoxo bixurun mu laxakapmek atdi. Ketla monga, dixo epovo na tong i do xopmen dina ven kibis laxakapmek. ²³Do nege taradi i xopara ia, neni i xopara bok ne Tamak. ²⁴Do nia gi toxo lok teven gugu silok kantubu atdi, ua kopmen tara ga lok teven gugu xuren, ixo epovo xusu nedi gita bixurun mi laxapmek, ketla monga digara ven pam levempanga sangsangu nia aga lox i, la nedi move di xopara ia la ne Tamak. ²⁵Ketla anai i lox asorun levelinga ik lok keneng at Lenavolo atdi i lok keretna.

‘Kopmen tavasuun at lebelemamao atdi saparav ia.’ *Sam 35:19, 69:4*

Laradi Loklok Tooro Naba Vot

²⁶La ne Iesu ga lok bok tidi, “Laradi loklok tooro naba vot; neni Loroonan at luruturun, la ni naba si boro vana at ne Tamak. Aba sak tiki i saparap nimi boro at ne Tamak, la neni naba tong asu levelinga mumu ia. ²⁷La nemi bok, miba paase asuusu minia, mila nemi migara nemen eburu vam minia; ga ru ka i at laaleng nenia aga ru ka lugugu rak.

16 ¹Agara tong axasep pam nimi mi na levempanga xusu mi noxo subu kot kantubu. ²Luvuttadi amgomgo dinaba sep pepe nimi xusu mi noxo vubeles bok ba uto at laraugu singising. La laaleng move naba vot, la do tara na sev amet tara atnimi, ni naba nua i do i lox i mo ri lox amomo ne Moroa. ³Dinaba lok na levempanga rinimi mila nedi xa xopmen dinaklen nema mi ne Tamak. ⁴La a tong pam i na rinimi, do levenaleng na vot kusu dina lok na levempanga, miba doxoma bilong ti na levelinga rak.”

Lugugu At Loroonan Kaala

La ne Iesu ga lok bok tidi xeretna, “Agoxo vaase i na levempanga at lavakpaxaru kaxat at levenanasa rak tinimi, mila aga nemen eburu

minimi. ⁵Ketla mo nga anat pas uto ap mo lara, neni ga riki ia ude, ketla kopmen tara dom kantubu atnimi gita sue ia do, unat pas ua? ⁶La mo nga nia a tong na levempanga rinimi, kuren la lainbulu mo ira umsu nga at lороoro atnimi. ⁷Ketla a tong tuturun i rinimi. I lox avukat do nenia ana on basinge nimi. Do nenia a noxo onon, laradi loklok tooro noxo vot pasa nimi. Ketla do ana onon, nenia aba riki aonon i ude saparap nimi. ⁸La do neni na vot, neni naba lox ase limixin at na lavatbung menemen do nedi di umsu mi laxakapmek la kopmen tomokmokso na nemen keneng atdi, la at laaleng ete, ne Moroa naba ronga linga at limixin axap. ⁹Neni naba lox ase di do di bixurun mi laxakapmek, mila kopmen dina nuunu rak. ¹⁰Neni naba lox ase di mi loklok mokmokso, mila nenia anabat pas uto at ne Tamak la minoxo ven bok ba ia. ¹¹Neni naba lox ase di do laaleng ete at ne Moroa naba vot, mila laradi gomgo at na lavatbung menemen, ne Moroa ira lok li vam i at lavapaase la ira li lumumuat mavana ren.

¹²A ruuna bok laxalinga solo xusu ana vaase nimi min, ketla naba lolos aleng tinimi xusu mina doxoma xaka i. ¹³Ketla Loroonan Kaala naba vot, ni naba paase asu luruturun at levelinga at ne Moroa, la ni naba anasa nga nimi mi mo levelinga axap i ruturun. Ni noxo anasa nimi mi lodoxoma axa ren, ketla neni naba paase asu levempanga neni ba ronga i boro at ne Moroa la neni naba paase nimi mi levempanga move naba vot. ¹⁴Neni naba lox asilok laasen tarak mi lugugu ren, mila neni naba lok kaka levelinga rak la na anasa nimi min. ¹⁵Levempanga ne Tamak i ruuna i, mo axav i atarak; kuren la a lok do Loroonan Kaala naba lok ka levelinga rak la ni na anasa nimi min.”

Lainbulu La Lomomo

¹⁶La ne Iesu ga lok bok, “Noxo lox abao la mi noxo ven ia la noxo lox abao la miba ven bok ba ia.”

¹⁷Leventaba atdi luvuttadi loklok ka anasa ren diga esue min kantubu atdi xeretna, “Ua lavasuun at na levelinga neni i tong i ridik? I lok do, ‘Noxo lox abao la mi noxo ven ia, la noxo lox abao bok la miba ven ia.’ La i lok bok do, ‘Mila nenia anat pas uto at ne Tamak.” ¹⁸La diga esue manga, “Ua lavasuun at na levelinga, ‘Noxo lox abao?’ Dik dixo xasep ap mo levelinga ren.”

¹⁹Iesu gaklen pam i do luvuttadi loklok ka anasa ren diga vara i do dina sue i mumu i na, kuren la neni ga lok tidi, “A tong i do, noxo lox abao la mi noxo ven ia, la noxo lox abao bok la miba ven bok ba ia. La mi esue mi na xantubu atnimi, do? ²⁰A tong tuturun i rinimi do, mibang teng la mina saxaanu. Ketla limixin at na lavatbung menemen diba momo; miba bulu, ketla lainbulu atnimi naba rem gili ri lomomo. ²¹Se do latkin i suma madak, neni i bulu, mila loxonaleng tin ti songot, ia vot pam; ketla do neni ira ranga madak, neni xopmen na doxoma

bok ba losongsongot teren, mila neni i momo mi lumumulum ira visik pam i. ²²I lok kuren mun tinimi; monga nemi mi bulu, ketla aba ven bok ba nimi la minaba umsu mi lomomo, la kopmen tara naba lok pes mo lomomo basinge nimi. ²³Do mo laaleng na vot, nemi noxo sue bok ba ia ri tavanga. A tong tuturun i rinimi, ne Tamak naba raba nimi mi levempanga salai nemi miba sing tin keneng at laasen tarak. ²⁴Ga ru ka i gano la ia se nga mo, mi goxo sing ti tevempanga xeneng at laasen tarak. Mina ngising ti tevempanga la miba ruuna ka i, kusu lomomo atnimi naba umsu.”

Iesu Ira Lox Asi Vam Laxakapmek At Na Lavatbung Menemen

²⁵Aga vaase na levelinga rinimi mi lempapaase poovo. Ketla laaleng move naba vot la nenia xopmen anoxo tong asu bok ba lempapaase poovo, ketla aba paase kasep tinimi mumu ne Tamak la miba xasep nunuan teren. ²⁶Do mo laaleng na vot, miba sing ne Moroa xeneng at laasen tarak; la axo tong i do nenia aba sing kusu ne Moroa naba lok tooro nimi. ²⁷Nemi xa mina sing ne Tamak mila ne Tamak axa i balamu aleng nimi. I balamu nemi mila nemi mi balamu ia la mira nuunu do nenia aga vas kaxat boro at ne Moroa. ²⁸Agat pas boro at ne Tamak la aga vot nade at na lavatbung menemen; la mo nga ana on basinge na lavatbung menemen la anamlong manga uto at ne Tamak.”

²⁹La luvuttadi loklok ka anasa ren diga lok tin, “I lox avukat, nenu mo u paase asaxaven ba, la kopmen bok ba una paase poovo. ³⁰Monga maklen ba i do nenu uklen levempanga axap; ixo epovo do tara naba sue u mi tevesusue. Anai i lok nema la ma nuunu do nenu uga laa boro at ne Moroa.”

³¹La ne Iesu ga lok tidi xeretna, “Mi nuunu ba mo, do? ³²Laaleng move naba vot, la na nga ia nemen pam, la miba epeseves basinge ia, la nenia xusuk abak lok. Ketla kopmen nenia xusuk, ne Tamak naba nemen eburu minia.

³³Agara tong pam i na rinimi xusu miba ruuna ka limila. Nemi minaba suma losongsongot boro at limixin at na lavatbung menemen. Ketla mina tu tuxuruxun. Ara los kimit pam laxakapmek at na lavatbung menemen.”

Lisingising At Ne Iesu

17 ¹Melemu at na levelinga Iesu ga milik aurut uto vana at laxalibet la ni ga sing keretna, “Tamak. Laaleng ira vot pam kusu una lox asilok laasen tarak, ne Nurum, la kusu nenia, ne Nurum, anaba lox asilok laasen taram. ²Nenu ga raba ia mi lololos tim gomgo ri limixin axap kusu ana raba lorooro avolo rinedi, uga raba ia midi. ³Lorooro avolo i lok keretna; do dinakleklen u, legesa Moroa ruturun kusuk mun la dinakleklen ia, ne Iesu Karisito, nenu ga riki ia ude. ⁴Nia agara lox asilok

pam laasen taram nade xopok at lavatbung menemen keretna, agara lox epovo vam lugugu uga raba ia min. ⁵La mo nga, Tamak, una lox asilok laasen tarak to melamgo ram, la kerepmo una lox asuusu lisisixam tarak aga ruuna avor i ri luruntudum li at na lavatbung menemen, at levenaleng aga nemen eburu minu.”

Iesu Ga Sing Ti Luvuttadi Loklok Ka Anasa Ren

⁶La ne Iesu ga sing bok keretna, “Nia aga lox asuvos laasen taram tinedi uga raba ia midi nade at na lavatbung menemen. Nedi limixin taram, la nenu uga raba ia midi la diga siam ka vam levelinga ram. ⁷Mo nga diklen i do loklok tarak mi levelinga rak, nenu ga raba ia min la di nuunu do nenia agat pas boro vana. ⁸Nia aga raba avolo levelinga ram la diga siam ka i. Di xasep avukat do aga rupot boro vana la di nuunu do nenu ga riki ia ude. ⁹Nia a sing tidi. Nia xopmen na sing ti limixin at na lavatbung menemen ketla a sing tinedi uga raba ia midi, mila nedi ataram. ¹⁰Levempanga axap tarak ik lok at lakngam, la levempanga axap taram ik lok at lakngak. La maxeneng teren uga lox asilok laasen tarak. ¹¹Nia noxo nemen nade at na lavatbung menemen, ketla nedi diba nemen de, la nia aba vosiga u. Tamak, nenu u melemelengan. Una lok tatao di mi lololos at laasen taram, neni mo laasen uga raba ia min, kusu nedi diba lok ngan legesara kerekngan neda ta lok ngan legesara. ¹²At levenaleng aga nemen eburu midi, aga lok tatao di mi nom laasen uga raba ia min. Kopmen tara atdi ga seeve, ketla legesara mun atdi naba seeve xusu na lox asorun levelinga at Lovoang Kaala.

¹³Mo nga ana vot pasa u, ketla a tong na levelinga ru at na lavatbung menemen kusu nedi na diba ruuna ka lomomo xerekngan lomomo rak. ¹⁴Nia aga raba vam di mi levelinga ram ketla limixin at na lavatbung menemen diga sok tixirixes di, mila nedi xopmen di mede at na lavatbung menemen, kerekngan nenia xopmen ia mede. ¹⁵Lisingising tarak kopmen do una lam ka di basinge na lavatbung menemen, ketla una lok tatao di basinge mo laradi xapmek. ¹⁶Nedi xopmen di mede at na lavatbung menemen kerekngan nenia kopmen mede at na lavatbung menemen. ¹⁷Una suxuna di mi levelinga ram, mila levelinga ram i ruturun. ¹⁸Aga riki nedi mi levelinga ram ti limixin at lavatbung menemen kerekngan mun uga riki ia ude at na lavatbung menemen. ¹⁹La ana raba lorooro rak kusu ri lok tooro di la kusu nedi bok diba raba ruturun lorooro atnedi ri lugugu rak.”

Iesu Ga Sing Ti Limixin Axap Di Nuunu

²⁰La ne Iesu ga sing bok ne Moroa keretna, “Kopmen ana sing kusuk tidi, ketla a sing bok tinedi vetpes diba nuunu rak mumu levelinga atdi. ²¹A sing u do nedi dina lok ngan mun legesara, Tamak, kerekngan mun

nenu uk lok keneng tarak la nia ak lok keneng taram. Una lok li di xusu dinak lok keneng atda, kusu limixin mun at lavatbung menemen diba nuunu do nenu uga riki ia ude. ²²Aga raba nedi mi lisisixam, kerekngan uga raba ia min, kusu nedi diba ngan legesara, kerekngan neda di ngan legesara. ²³Nenia xeneng atdi la nenu xeneng tarak, kusu nedi diba tu buru rinotno, la limixin at na lavatbung menemen dibaklen i do nenu ga riki ia la uga balamu di ngan mun u balamu ia.

²⁴Tamak. Uga raba vam ia midi, la a vara i xusu dina nemen eburu minia ap mo lenep nenia ana nemen e, kusu diba ven lisisixam tarak, mo lisisixam nenu ga raba ia min, mila uga balamu ia avot ti luruntudum li at na lavatbung menemen.

²⁵Tamak. Luruptuvuk taram ik mokso, la limixin at na lavatbung menemen kopmen dinaklen u, ketla nenia aklen u, la nedi na diklen i do uga riki ia ude. ²⁶Aga lox asuvos u ridi, la aba lok amisik box i, kusu labalamu u ruuna i ria naba nemen atdi, la nenia bok aba nemen keneng atdi.”

Diga Ranga Alis Ne Iesu

(Mt 26:47-56; Mk 14:43-50; Lu 22:47-53)

18 ¹Melemu at na lisingising, Iesu eburu mi luvuttadi loklok ka anasa ren diga vas kaxat la diga volo korop lasa dan Kidron. Lara laraamang olip ga nemen ap mo lenep, la ne Iesu ga vas beles go xeneng eburu mi luvuttadi loklok ka anasa ren.

²La ne Judas, mo laradi ga song araba ne Iesu, gaklen mo lenep laraamang gak lox e, mila buaang levenaleng ne Iesu eburu mi luvuttadi loklok ka anasa ren digat pot buru go. ³Lavamaasa silok mi lubung Parisi diga riki luvuttadi gugu atdi xusu dina emu mi ne Judas. Leventaba luvuttadi esep bok mo. La ne Judas gamgo nga di uto at laraamang. Digap kip levenapti mi lenbabao, la levempanga esep atdi.

⁴Iesu garaklen pam levempanga axap mo ga lok do na vot parav i; kuren la ni ga vas tangarang di la ga lok tidi, “Nege mo nemi mi reven tin?”

⁵La diga vorang i, “Iesu boro Nasaret.”

La ne Iesu ga lok, “Nenia vam na.” La ne Judas, laradi sosolo arup mo ga tu eburu midi. ⁶Se ne Iesu ga lok tidi do, ‘Nenia vam na,’ digasko lili bilong la diga subu si ukopok at laxangka.

⁷La ne Iesu ga sue manga di, “Nege i mo nemi mi reven tin?”

La diga lok, “Iesu boro Nasaret.”

⁸La ne Iesu ga lok tidi, “Ara tong pam i do nenia vam na. Mo do nemi mi reven tia, mina ke aonon di na leventaba.” ⁹Ni ga tong i na xusu levelinga ren ni ga tong avot pam i na soxos, “Tamak, aga lok tatao avukat nedi na uga raba ia midi.”

¹⁰Simon Pita ga ruuna lavarise sepsep; neni ga rev asu i la ga sep korop labaalung tino at lasaxaruki at lamaasa gomgo min. Laasen ap mo lasaxaruki ne Malkas.

¹¹Iesu ga lok ti ne Pita, “Una ke xepe lavarise sepsep taram. Kereva? U doxoma i do nenia xopmen a noxo songot at langas ne Tamak gara raba vam ia min?”

Iesu Ga Ru Ro Melamgo At Ne Anas

¹²Luvuttadi esep eburu mi laradi gomgo atdi la lavaeme silok me Judaia diga ranga alis ne Iesu, la diga xoxo i. ¹³La diga lam ka avor i uto at ne Anas. Neni ne nimino ne Kaiapas, la ne Kaiapas neni lamaasa gomgo ap mo lamaares. ¹⁴La neni mun na ne Kaiapas mo ga tong i ri luvuttadi amgomgo do i lox avukat do tegesa radi mun naba met nop limixin axap.

Pita Ga Sok Tixirixes Ne Iesu

(Mt 26:69-70; Mk 14:66-68; Lu 22:55-57)

¹⁵Simon Pita mi lara laradi loklok ka anasa bok duga mumu ne Iesu. Lamaasa gomgo gakleklen avukat mo laau, kuren la neni ga emu eburu mi ne Iesu uto xeneng at lemelua saparap loogu at lamaasa gomgo. ¹⁶La ne Pita ga nemen to maxamang at lumusmaragu. La mo laau ne Kaiapas gaklen avukar i, ga vas su ukamang, la ga tong i ri lara loolik go at lumusmaragu xusu ri siam abeles ne Pita ukeneng.

¹⁷La mo loolik go at lumusmaragu ga lok ti ne Pita, “Kereva, nenu bok pam lara atdi mo luvuttadi loklok ka anasa at nom laradi?”

Pita ga vorang i, “Nenia xopmen.”

¹⁸Ga lamdut aleng, kuren la lavasaxaruki la lavaeme silok diga lox antos laxao la diga tu kangkan i xusu dina mamain. Kuren la ne Pita bok gat pas ugo la ga tu mamain eburu minedi.

Lamaasa Gomgo Ga Susue Ne Iesu

(Mt 26:59-66; Mk 14:55-64; Lu 22:66-71)

¹⁹Ap mo mun loxonaleng lamaasa gomgo ga sue ne Iesu mumu luvuttadi loklok ka anasa ren la levenanasa bok teren.

²⁰La ne Iesu ga lok, “Aga paase at lasaxaven ti limixin axap, la levenanasa rak aga lox i ro xeneng at laraugu singising la loogu laplavang; la limixin me Judaia digat pot buru amisik. A goxo vaase alipe tepanga. ²¹La tila ba u susue ia? Una sue limixin digang tonga ia. Diklen tinotno levelinga rak.”

²²Se ne Iesu ga tong i na, lara leeme silok mo ga tu, ga vasa lavapaales at ne Iesu la ga lok, “I lok kapmek do u paase keretnom ti lamaasa gomgo.”

²³La ne Iesu ga vorang i rin keretna, “Dola nia go a vaase kapmek toxot, una tong i ri na limixin axap do levelinga salai mo i lok kapmek. Ket do nia a tong asu levelinga ruturun, tila u vasa ia?” ²⁴La ne Anas ga riki aonon i uto at ne Kaiapas, mi laxanoos move at lukngen. Kaiapas neni lamaasa gomgo.

Pita Ga Sok Tixirixes Amu Manga Ne Iesu
(*Mt 26:71-75; Mk 14:69-72; Lu 22:58-62*)

²⁵Pita move ga tu go gak lok mamain. La diga lok tin, “Nenu bok laradi loklok ka anasa at nom laradi.”

Ketla ne Pita ga sok tixirixes i, la ga lok, “Nenia xopmen.”

²⁶Lara lasaxaruki at lamaasa gomgo, neni at libibinat ap mo laradi ne Pita ga ra korop pes labaalung teren, ga lok, “Nenia a ven box u ro at laraamang olip.” ²⁷La ne Pita ga lok bok, “Kopmen.” La ap mo mun loxonaleng laxaxak ga reng.

Iesu Ga Tu Ro Melamgo At Ne Paelat
(*Mt 27:1-2, 11-14; Mk 15:1-5; Lu 23:1-5*)

²⁸Ga maxantamak suubu at labarakoxot lavamaasa silok diga lok ka ne Iesu boro at loogu at ne Kaiapas la uto at loogu nunuan at laradi gomgo boro Rom; limixin me Judaia di goxo vubeles go xeneng at loogu nunuan mila diga xopara i xusu dina lox abilinga lorooro atdi at lemeren ne Moroa, la di noxo epovo do dina anan at leluxa at Lovovolo Pe. ²⁹Kuren la ne Paelat ga vas su vosiga di ro xamang la ga sue di xeretna, “Lavanga salai mo nemi mi vaase mumu na laradi min?”

³⁰La diga vorang i xeretna, “Mo do neni xopmen laradi xapmek, ixo epovo xusu nema giba lok ka i ude saparav u.”

³¹Paelat ga lok tidi, “Nemi xa mina lok ka i la mina ronga linga ren kerekngan Lenavolo atnimi i tong i.”

La diga lok, “Nemi boro Rom kopmen mina mulus tinama do mana sev amet tara.” ³²Anai levelinga atdi ga soxos ti levelinga ne Iesu ga tong i mumu lanmet salai ba vot tin.

³³Paelat gamlong ukeneng at loogu silok la ga ro ka ne Iesu la ga lok tin, “Kereva, nenu loorong silok at limixin me Judaia?”

³⁴Iesu ga vorang i rin keretna, “Na lususue u sue ia min ataram axa, kopla teventaba vetpes di tong i ru?”

³⁵Paelat ga vorang amlong i rin keretna, “U doxoma i do nenia boro Judaia? Limixin axa ram la lavamaasa silok atdi, nedi di song araba ia minu. Lavanga salai uga lox i?”

³⁶Iesu ga lok, “Nenia xopmen ana lok ngan lavaorong silok mede at na lavatbung menemen; mo do nenia gi lok ngan di, luvuttadi di mumu asu ia giba esep eburu mi luvuttadi amgomgo xusu di noxo ranga alis ia. Lixitkis orong tarak kopmen mede xopok at na lavatbung menemen.”

³⁷La ne Paelat ga sue, “Kereva, nenu loorong silok?”

Iesu ga vorang i rin keretna, “I ruturun do nenia loorong silok. Lavasuun at lovtopot tarak ti na lavatbung menemen i lok keretna; ana tong asu luruturun. Do luruturun ik lok at tara, neni ing tonga ia.”

³⁸Paelat ga sue i, “Lavanga salai nom luruturun?”

La ne Paelat gamlong amu manga uto xamang ti luvuttadi amgomgo la ga lok tidi, “Kopmen nia ana vuse ka tavasuun kusu ri sev amet na laradi. ³⁹Ketla lara loklok atnimi do amisik ak soxomus asu laradi xokoxo at leluxa at Lovovolo Pe. Kereva, i epovo do ana soxomus asu loorong silok at limixin me Judaia rinimi?”

⁴⁰La diga vorang ne Paelat mi luxupkup lolos keretna, “Kopmen tinotno. Una soxomus asu ne Barabas.” Barabas neni laradi sepsev amet tadi la laradi sep paxat panga.

Paelat Ga Lok Li Lumumuat Mavana At Ne Iesu

19 ¹La ne Paelat ga lox aonon ne Iesu xusu luvuttadi esep dinak pixis i. ²La luvuttadi esep diga vele lavatkiam tin mi livin gagas la diga lok li i ro at lavatlak teren; diga lok ka labantamon memele at loorong silok la di ga lok li box i at ne Iesu. ³La digat pas li ren la digak lok kalise i xeretna, “Ma emi asu minu, loorong silok me Judaia.” La melemu diga pasa lemeren.

⁴Paelat ga vas su amu manga uto xamang la ga lok ti limixin, “Mina rongga i na; ana lok ka i ude xamang tinimi, xusu miba xasep do axo ka tavasuun kusu ri lok li lumumuat teren.” ⁵La ne Iesu ga vas su ukamang mi lavatkiam diga vele i mi laban gagas la labantamon memele. La ne Paelat ga lok tidi, “Mina ven i. Neni nga na laradi.”

⁶Se lavamaasa silok la luvuttadi silok at loogu laplavang diga ven ne Iesu, diga xup keretna, “Mina vaxarem i ro at laxaba; mina vaxarem i ro at laxaba.”

Paelat ga lok tidi, “Nemi xa mina lok ka i, la mina vaxarem i ro at laxaba. Nenia axo vuse ka tavasuun kusu ri lok li lumumuat teren.”

⁷Luvuttadi amgomgo diga lok tin keretna, “I epovo do neni na met mila ni ga los polo Lenavolo atnama, i lok do neni ne Nitna ne Moroa.”

⁸Se ne Paelat ga rongga mo levelinga, neni ga marat aleng. ⁹Neni gamlong uto xeneng at loogu silok la ga sue ne Iesu xeretna, “Nenu uga laa meva?” Ketla ne Iesu goxo vorang lususue ren. ¹⁰La ne Paelat ga lok tin, “U xopara una vaase ria? Una xasep do a ruuna lololos kusu ri soxomus asu u, la ri vaxarem box u at laxaba.”

¹¹Iesu ga lok tin keretna, “U ruuna lololos mavana rak mila ne Moroa mun ga raba u min. Na lavanga u lox i ria i lok kapmek, ketla mo laradi ga song araba ia ru, laxakapmek teren i silok aleng.”

¹²Se ne Paelat ga rongga i na, neni ga lok tong pen i do na vuse ka tangas kusu ri soxomus asu ne Iesu. Ketla luvuttadi amgomgo diga xup

lolos keretna, “Mo do una soxomus asu i, i ven ngan ta do nenu xopmen lentangas at ne Kaisar. Nom laradi ga lox asilox i ngan loorong silok, kuren la neni laradi munepen mi ne Kaisar.”

¹³Se ne Paelat ga rongga na levelinga, neni ga lam asu ne Iesu ukamang la ni ga xis kopok to at loxot kitkis ting tonga linga, laasen teren do, ‘Langas Uat.’ At lavapaase Ibru diga tong i do ‘Gabata.’ ¹⁴Na levempanga ga ravasu at lasangaun mi legepu xonaleng at laaleng gagas ti mo laaleng at leluxa at Lovovolo Pe.

La ne Paelat ga lok ti luvuttadi amgomgo, “Loorong silok atnimi na.”

¹⁵Diga xup lolos keretna, “Sev amer i. Sev amer i. Paxarem i ro at laxaba.”

Paelat ga sue di xeretna, “Kereva, mi vara i do ana vaxarem loorong silok atnimi ro at laxaba?”

La lavamaasa silok diga vorang i rin keretna, “Loorong silok mun atnema ma ruuna i, neni ne Kaisar.”

¹⁶La ne Paelat ga song araba ne Iesu ridi xusu dina vaxarem i ro at laxaba. La luvuttadi esep diga lok ka ne Iesu.

Diga Vaxarem Ne Iesu At Laxaba

(Mt 27:32-44; Mk 15:21-32; Lu 23:26-43)

¹⁷La ne Iesu ga vas su la ga sosolok laxaba ren la gat pas uto at loxot, laasen teren, “Lavatlak Tongan.” At lavapaase Ibru, laasen teren do Golgata. ¹⁸Mo go diga vaxarem ne Iesu ro at laxaba; la diga vaxarem bok legepu radi at luxaba, lara saparap lekngen tino ne Iesu la lara saparap lekngen kia; la ne Iesu ga merem kantubu atdu.

¹⁹La ne Paelat ga malagan langas linga la diga lok li i ro vana at laxaba. Mo levelinga ga lok keretna, ‘Iesu boro Nasaret, loorong silok at limixin me Judaia.’ ²⁰La buaang atnedi limixin me Judaia diga us i na, mila mo loxot diga vaxarem ne Iesu ren, kopmen goxo vaxalom boro at lemenemen silok, Jerusalem. Na langas linga diga malagan i at lempapaase Ibru, Latin la Grik. ²¹La lavamaasa silok diga lok ti ne Paelat, “Nemen uta malagan i do, ‘Loorong silok at limixin me Judaia.’ Ketla una malagan i do, ‘Na laradi ga lok do neni loorong silok at limixin me Judaia.’”

²²La ne Paelat ga lok, “Lavanga salai ara malagan pam i, keke i xuren.”

²³Melemu at luvuttadi esep diga vaxarem ne Iesu ro at laxaba, diga lok ka levempanga singsiga ren la diga epes i ri lavanuet beleben; i epovo ri lavanuet luvuttadi esep. Ketla diga ke be lavanga singsiga ren boro maxeneng, mo lavanga singsiga di goxo sok gatga li toxot teren. Limixin diga lox i ngan legesa bantamon, ga ru ka i ro vana la ukopok epopolo.

²⁴La luvuttadi esep diga lok tinedi getgesara, “Nemen gat dik guta ba koxorov i, ata lu buru mi lengkonuat kusu ri lok kisip ka nege naba lok ka i.”

Anai ga vot kusu ri lox asorun levelinga xeneng at Lovoang Kaala; i lok keretna,

‘Diga epes levempanga singsiga rak kantubu atdi, la diga lu buru mi lengkonuat kusu ri lok kisip ka nege naba lok ka labantamon tarak.’

Sam 22:18

La luvuttadi esep diga lox i xerepmo.

²⁵Leventaba lavakin diga tu auret saparap laxaba at ne Iesu; nenen, la neton, la ne Maria, latkin at ne Kliopas, la ne Maria Magdalene. ²⁶Iesu ga ven nenen la laradi loklok ka anasa ren, neni ga vavara aleng i, duga tu go; kuren la neni ga lok ti nenen keretna, “Neni lamdak taram.” ²⁷La neni ga lok ti laradi loklok ka anasa ren keretna, “Neni nenam.” Ga ru ka i ap mo loxonaleng mo laradi loklok ka anasa ga lok ka i xusu na lok tatao i ro xolonu ren.

Lanmet At Ne Iesu

(Mt 27:45-56; Mk 15:33-41; Lu 23:44-49)

²⁸Melemu ne Iesu gaklen i do levempanga axap mo diga lok axap pam i ri lox asorun levelinga xeneng at Lovoang Kaala mumu i; neni ga lok, “A minu.” ²⁹Lara lavatbuxom tuntu mo ga nemen go, ga umsu mi lavaen mamao. Diga lox abeles loxonbantamon teren la diga lok li i at loxonuna isop, la diga lox aurur i saparap lungusno at ne Iesu. ³⁰Iesu ga in mo lavaen la melemu ga lok keretna, “I xap ta.” La lavatlak teren ga riding si la neni ga met.

Laradi Esep Ga Bo Labangbaangis At Ne Iesu Mi Lososo

³¹Mo laaleng ni laaleng gagas, la laaleng melemu ren ni laaleng kaala, la luvuttadi amgomgo di goxopara i do labarongan nak lok at larakaba at laaleng kaala, mila ti mo laaleng kaala, ni laaleng silok tinotno. Kuren la diga sue ne Paelat do luvuttadi esep dina sep pit lengkangkedek at luvuttadi diga vaxarem di at larakaba xusu dinaba remet soso la dina lox asi nedu basinge larakaba. ³²Kuren la luvuttadi esep digat pas la diga sep pit lengkangkedek ap mo luradi duga merem at luxaba saparap ne Iesu. ³³Ketla se diga vot go at ne Iesu, diga ven i do neni ga met pam; kuren la di goxo sep pit luxangkedek teren. ³⁴Ketla lara laradi esep ga bo rup mi lososo ro at labangbaangis at ne Iesu la soso mun lada eburu mi ladan ga sen su.

³⁵Lara laradi ga ven na levempanga, neni i paase asu i ri limixin la levelinga ren i rutorun. La iklen i do levelinga ren i rutorun la i tong asu i xusu nemi bok mina nuunu at ne Iesu. ³⁶Na levempanga ga ravasu xusu ri lox asorun levelinga at Lovoang Kaala, i lok keretna,

‘Kopmen tekosi ren naba repit.’

Pas 12:46

³⁷La lara lenep at Lovoang Kaala i lok bok keretna,

'Limixin diba ven ti mo laradi diga bo i mi lososo.'

Sak 12:10

Digak Mit Labantuxu At Ne Iesu
(*Mt 27:56-61; Mk 15:42-47; Lu 23:50-56*)

³⁸Melemu at nai, Josep boro at lemenemen Arimatia, ga sing ne Paelat do ni na lok ka labantuxu at ne Iesu. Josep neni laradi loklok ka anasa at ne Iesu. Ketla neni goxo mumu i at lasaxaven mila neni ga marat at luvuttadi amgomgo. Paelat ga tong i rin do i epovo do ni na lok ka labantuxu at ne Iesu. Kuren la ne Josep gamlong la ga lox asi labantuxu ren. ³⁹Nikodimas, gano ga mu bung kusu na vaase mi ne Iesu, neni ga emu mi ne Josep, gap kip laxadan somavak ti lok li at labantuxu at ne Iesu. Mo ladan ga mumuat aleng. ⁴⁰Nedu duga lok kaka labantuxu at ne Iesu la duga vaxais i mi labantamon di bom tongan min la duga lok li laxadan somavak teren; kerepmo limixin me Judaia diga mumu asu i na ngan leretere atdi. ⁴¹Lara laraamang mo ga nemen saparap mo loxot diga vaxarem li ne Iesu ren, la keneng teren lara lamaaut maxat mo gak lok, la limixin di goxovisi li rongan go. ⁴²Mo lamaaut ga nemen auret, kuren la diga lok li soso mun ne Iesu mila mo laaleng ni laaleng gagas at limixin me Judaia ri laaleng kaala.

Iesu Ga Roo Xat Amlong At Lanmet
(*Mt 28:1-8; Mk 16:1-8; Lu 24:1-12*)

20 ¹No mene maxantamak suubu at laaleng avot ap mo luik, lavanga move gak lok main. Ne Maria Magdalene gat pas uto at lamaaut la ga ven i do leventaba diga xuvun pes pam luat boro at lungusungus at lamaaut. ²Ni ga sixit kaxat la ga vosiga ne Simon Pita la lara laradi loklok ka anasa bok, ne Iesu ga vavara aleng tin, la ga lok tidu xeretna, "Dira lok ka vam Leeme Silok boro at lamaaut la dik dixoklen i do di lok li i ua."

³La ne Pita mi mo lara laradi loklok ka anasa duga vas kaxat uto at lamaaut. ⁴La dugak sixit, ketla mo lara laradi loklok ka anasa ga sixit polo ne Pita la ga vot avot to at lamaaut. ⁵Ni ga rikbu si ukopok la ga ven lenbantamon mikmit tongan, ketla ni goxo vubeles ukeneng. ⁶Ga melemu ren ne Simon Pita, la ni ga vubeles epolo ukeneng at lamaaut. Ni ga ven lenbantamon mikmit tongan gak midi go, ⁷la mo loxontamon diga vaxais kangkan lavatlak at ne Iesu min, goxok midi eburu mi lenbantamon mikmit tongan, ketla ga repes pam la gak midi at lenep petpes. ⁸Melemu mo lara laradi loklok ka anasa, mo ga rupot avot to at lamaaut, neni bok ga vubeles ukeneng la ni ga ven i la ga nuunu do ne Iesu ga roo xat pam. ⁹Du goxovisi xasep at levelinga at Lovoang Kaala, ga tong i do neni naba roo xat amlong bok basinge lanmet. ¹⁰Melemu dugamlong uto xolonu.

Iesu Ga Ru Asuvos Ti Ne Maria Magdalene
(*Mt 28:9-10; Mk 16:9-11*)

¹¹Maria mo ga tu go maxamang at lamaaut; neni gang teng, la ga rikbu beles ukeneng at lamaaut, ¹²la ga ven luangelo go, duga siga levempanga

bunbun, la dugat kis at lenep labantuxu at ne Iesu gak midi e; lara ro at lavatlak la lara ro at luxangkedek.

¹³La duga sue i, “Latkin, ung teng atla?”

La ni ga lok, “Di lok ka vam Leeme Silok tarak uto, la axoklen i do di lok li i ua.” ¹⁴Se neni ga vaase axav i na, neni ga rem gili la ga ven ne Iesu ga tu go; ketla neni goxoklen i do neni ne Iesu.

¹⁵Iesu ga sue i, “Latkin, ung tingis lai? La nege mo nu u reven pupuke rin?”

Maria ga nua i do, neni laradi loklok tatao ap mo laraamang; kuren la neni ga lok tin, “Mo do ura lok ka vam i uto, tong axasev ia do u lok li i ua, la abat pas la ana lok ka i.”

¹⁶Iesu ga lok tin, “Maria.”

La ne Maria ga rem gili la ga vaase mi lavapaase Ibru, “Raboni.” Lavasuun teren keretna, leeme loklox ase.

¹⁷Iesu ga lok tin, “Nemen uta ranga tu rak, mila a xovisi ana onon uto vana at ne Tamak. Ketla una vosiga luvutnetak la una tong i ridi do anamlong be uto at ne Tamak, neni ne Temen nimi bok, Moroa rak, neni ne Moroa box atnimi.” ¹⁸La ne Maria Magdalene ga onon la ga tong i ri luvuttadi loklok ka anasa do neni ga ven pam Leeme Silok la ga tong levelinga at ne Iesu ridi.

Iesu Ga Vot Saxaven Ti Luvuttadi Loklok Ka Anasa Ren (*Mt 28:16-20; Mk 16:14-18; Lu 24:36-49*)

¹⁹Ga ukantinao at laaleng avot ap mo luik luvuttadi loklok ka anasa digak lox eburu ro xeneng at lara loogu la diga soxoba pe axap levenmusaragu mila diga e amarat at luvuttadi amgomgo. La ne Iesu ga vot la ga ru go xantubu atdi, la ga lok, “Limila nak lox eburu minimi.”

²⁰Melemu at levelinga ren, neni ga vaxase luvuttadi loklok ka anasa ren mi lukngen la labangbaangis teren. La diga umsu mi lomomo ap mo loxonaleng diga ven Leeme Silok.

²¹La ne Iesu ga lox amu manga ridi, “Limila nak lox eburu minimi. Ne Tamak ga riki ia, kuren la nenia bok, ana riki nimi.” ²²La ni ga mas asu lamamas teren tidi la ga lok tidi, “Mina lok kaka Loroonan Kaala. ²³Do mina doxoma xepe leveloklok kakapmek at tara, i lok ngan ne Moroa i doxoma xepe i. Do mixo doxoma xepe leveloklok kakapmek at tara, i lok ngan ne Moroa xopmen na doxoma xepe i.”

Iesu Ga Ru Asuvos Ti Ne Tomas

²⁴Tomas, laasen bok teren ne Didimas, neni lara at lasangaun mi legepura luvuttadi loklok ka anasa at ne Iesu. Neni goxok lox eburu mi luvuttadi loklok ka anasa ap mo laaleng ne Iesu ga vot pasa di. ²⁵Diga tong i rin do diga ven Leeme Silok la ni ga lok tidi keretna, “Do a noxo

ven levenin kooxing at lukngen la ana long tu ren la na long tu bok at labangbaangis teren, nenia a noxo nuunu do neni ga roo xat amlong basinge lanmet.”

²⁶Melemu at lavanuti aleng, luvuttadi loklok ka anasa diga nemen manga ap mo loogu, Tomas bok mo gak lok. La diga soxoba pe axap levenmusaragu, ketla ne Iesu ga vot la ga ru xantubu atdi la ga lok tidi xeretna, “Limila na nemen eburu minimi.” ²⁷La ni ga lok ti ne Tomas, “Una long tu de, una ven lukngak. Una song asu mi lakngam la una long tu at labangbaangis tarak. Nemen lodoxoma ram na sixit ekarakat, ketla una nuunu rak.”

²⁸La ne Tomas ga lok tin, “Nenu Leeme Silok tarak la lo Moroa rak.”

²⁹La ne Iesu ga lok tin, “Ura ven pam ia, kuren la u nuunu rak. Luvukat bak lok tinedi di xovisi na ven ia, ketla di nuunu rak.”

³⁰Iesu ga lok buaang levempanga sangsangu ro melamgo at luvuttadi loklok ka anasa ren, la levelinga ren kopmen nak lok at na lubuk. ³¹Ketla leventaba levempanga sangsangu ik lok at na lubuk kusu mina nuunu do ne Iesu neni Lanarong la Nitna ne Moroa; la do mina nuunu ren, miba ruuna ka lorooro avolo at laasen teren.

Lavanga Sangsangu Mumu Laxanmat

21 ¹Melemu ne Iesu ga ru asuvos ti luvuttadi loklok ka anasa ren to saparap lavatdan kis, Tiberias. Ga ravasu xeretna. ²At lara laaleng ne Simon Pita, la ne Tomas, laasen bok teren ne Didimas, la ne Natanael boro Kena at lenep silok Galili, la lumdak at ne Sebedi, la lara laradi loklok ka anasa bok digak lox eburu. ³La ne Pita ga lok tidi, “Nenia anat pas kusu ri sep mat.” La diga lok tin, “Nema bok mana emu minu.” La nedi axap diga vas kaxat la diga los kas at lese pang la digatla xat. Ketla ap mo laxanimin di goxo sep ka tepenmat.

⁴Maxantamak suubu ne Iesu ga ru ro loxon, ketla luvuttadi loklok ka anasa di goxo ven kibis i.

⁵Neni ga toro ridi xeretna, “Laxamdak. Kereva, mi sep ka tevenmat?” La diga vorang i rin keretna, “Kopmen.”

⁶La ni ga lok tidi xeretna, “Mina lu mi laxatkat atnimi ro at lenep tino at lese pang la mina sep ka tevenmat.” Diga lox i xuren la di goxo epovo na sat amlong laxatkat mila ga umsu mi laxanmat solo. ⁷La mo laradi loklok ka anasa ne Iesu ga vavara aleng i, ga lok ti ne Pita, “Leeme Silok mo.” Pita ga ronga i nom la soso mun ni ga etara lavanga singsiga ren, no ni ga lok kepe i, la ga los si uto at ladan la ga xobok uto loxon. ⁸Luvuttadi loklok ka anasa diga mumu mi lese pang, diga sasat laxatkat ga umsu mi laxanmat, mila digak lox auret mun loloxon. ⁹Se diga oso, diga ven laxao mi levenmat gak lok teren la diga ven bok lengkongkide ga nemen saparap laxao. ¹⁰La ne Iesu ga lok tidi, “Mina lok ka tevenmat at nom ude.”

¹¹La ne Simon Pita ga los kas at lese pang la ga oso mi laxatkat, ga umsu mi laxanmat silok ga epovo at legesa sangaun kobot mi lavalimo sangaun mi lavantun (153). Laxanmat solo ketla laxatkat kopmen goxo rem das. ¹²La ne Iesu ga lok tidi, “Ude nimi la mina anan be.” Kopmen tara atdi luvuttadi loklok ka anasa gita sue i do neni nege mila digaklen i do neni Leeme Silok. ¹³La ne Iesu gat pas la ga lok kaka lengkongkide la ga raba di min la ga raba bok di mi levenmat. ¹⁴Na lo votpot sev avantun at ne Iesu saparap luvuttadi loklok ka anasa ren melemu at laxakatu kaxat amlong teren at lanmet.

Iesu Ga Epaase Mi Ne Pita

¹⁵Se diga an axap pam, Iesu ga sue ne Simon Pita, “Simon, lamdak at ne Jon. Kereva, labalamu ram tia i silok aleng ti labalamu ram ti na luvuttadi?”

Ni ga vorang i rin keretna, “Laaba, Leeme Silok. Uklen i do a balamu u.”

La ne Iesu ga lok tin, “Una raba luxa laxannat sipsip tarak.”

¹⁶La ne Iesu ga sue manga i, “Simon, lamdak at ne Jon. Kereva, u balamu ruturun ia?”

La ni ga vorang i, “Laaba, Leeme Silok. Uklen i do a balamu u.”

La ne Iesu ga lok tin, “Una lok tatao levesipsip tarak.”

¹⁷La ne Iesu ga sue sev avantun box i xeretna, “Simon, lamdak at ne Jon. Kereva, u balamu ia?”

La ne Pita ga lok tuntun mila ne Iesu ga sue sev avantun box i, ‘Kereva, u balamu ia?’. La ni ga lok ti ne Iesu, “Leeme Silok, ukleklen lempanga axap, uklen i do nia a balamu u.”

La ne Iesu ga lok tin, “Una raba luxa levesipsip tarak. ¹⁸A tong tuturun i. Ga se nenu laau maxat mene, uga siga lempanga singsiga ram la ugat pas mu lavavara ram. Ketla do una sioxo, ubang song asu mi lukngam la tara vetpes nabak paxasiga u la dibam lam ka u uto at lengkot u noxopara unat pas uve.” ¹⁹Iesu ga tong i na xusu na lox ase ne Pita mi lanmet salai ni ba met teren kusu na lox aurut laasen at ne Moroa. La ni ga lok ti ne Pita, “Una mumu asu ia.”

²⁰Pita ga rem gili la ga ven i do mo laradi loklok ka anasa ne Iesu ga vavara aleng i, ga mumu asu du. Neni mo lara ga sep sogo at lobongobong at ne Iesu at laanan kaala la ga lok tin, “Leeme Silok, nege ba song araba u ri limixin kapmek?” ²¹Pita ga ven i la ga sue ne Iesu, “Leeme Silok, lempanga salai mo ba vot saparap na laradi?”

²²Iesu ga vorang i rin keretna, “Do nenia a vara i do neni na rooro se at lomlong tarak, nemen uta doma solo i nom. Nenu una mumu asu ia.” ²³Luvuttadi loklok ka anasa diga rongga na levelinga la diga tong i ri lavanga do mo laradi loklok ka anasa noxo met. Ketla ne Iesu goxo tong i

xuren, neni ga lok mun keretna, “Do nenia a vara i do neni na rooro se at lomlong tarak, nemen uta doma solo i nom.”

²⁴Mo laradi loklok ka anasa ga ven na lempanga la ga malagan levelinga at na lubuk, la maklen i do levelinga ren i ruturun.

²⁵Iesu ga lok lempanga vetpes bok i buaang aleng. Do tara na malagan alii na lempanga axap, agut laxanbuk naba umsu aleng la na lavatbung menemen axap noxo epovo rin.